

東  
華  
續  
錄

東華續錄

光緒一百四十一

臣朱壽朋敬編

臣潘鴻鼎恭校

九月丁亥朔 上幸頤和園謁 慈禧端佑康頤昭豫莊誠壽恭欽獻崇熙皇太后前請安駐蹕○戊子召鹿傳霖回京以李秉衡爲四川總督○以張汝梅爲山東巡撫○庚寅 上還宮○以李希蓮爲陝西布政使玉恆爲貴州按察使○以廖壽恆爲刑部尙書徐樹銘爲左都御史○調徐曾澧爲吏部右侍郎轉張英麟爲禮部左侍郎以唐景崇爲禮部右侍郎○諭吏部奏遵議處分一摺薛允升著照部議降三級調用刑部郎中党蒙著降一級留任其分別議處之堂司各官刑部郎中英瑞熊起礪等著罰俸一年刑部尙書調署工部尙書松淮刑部左侍郎阿克丹刑部左侍郎調補倉場侍郎李端棻刑部右侍郎文琳前署刑部右侍郎調補吏部右侍郎徐樹銘均著罰俸六箇月以上各員均著不准抵銷○辛卯以廖壽恆兼署兵部尙書○以徐曾澧兼署禮部右侍郎○電 諭依克唐阿昭烏達盟馬賊肆擾已派齎士成帶兵馳往會同敖漢王剿辦現據探聞賊匪均逃奉天東山等處潛匿山中等語馬賊聲氣相通此拿彼竄是其慣技著依克唐阿飭屬派兵追捕務絕根株毋使屯聚勾結爲要○甲午 上幸頤和園謁

東華續錄

光緒一百四十一

慈福端佑康頤昭豫莊誠壽恭欽獻崇熙皇太后前請安駐蹕○丙申諭朕欽奉 慈福端佑康頤昭豫

莊誠壽恭欽獻崇熙皇太后懿旨本年十月初十日萬壽慶辰在頤和園排雲殿受賀欽此是日宣表行禮朕

親進表文初八日朕率領王公百官詣 仁壽殿筵宴初九日皇后率領內廷公主福晉命婦詣 仁壽

殿筵宴所有應行典禮著各該衙門敬謹預備○諭本年十月初十日恭逢 慈福端佑康頤昭豫莊誠

壽恭欽獻崇熙皇太后萬壽慶辰欽奉 懿旨有在頤和園慶賀筵宴所有應行典禮派恭親王慶親王奕

劻會同禮部內務府敬謹辦理○丁酉 上還宮○刑部左侍郎巴克坦布卒賜卹如例○戊戌 上御

文華殿瑞典挪威國使臣柏固覲見○辛丑 上幸頤和園詣 慈福端佑康頤昭豫莊誠壽恭欽獻崇

熙皇太后前請安駐蹕○癸卯 上還宮○甲辰以徐承煜爲左副都御史○乙巳電 諭依克唐阿前

因馬賊竄陷奉天東山卽飭依克唐阿派隊搜剿現在情形如何該處係遼陽地方與蒙古毗連諸土成

現駐劄陽原可彼此照會合力剿拿以期速了○丙午祭 歷代帝王廟遣載勛行禮○上幸頤和園詣

慈福端佑康頤昭豫莊誠壽恭欽獻崇熙皇太后前請安駐蹕○戊申 上還宮○己酉諭軍機大臣

等本年入夏以來據鄂華熙先後奏稱安徽各屬晴少雨多疊經諭令查明被水處所隨時撫恤茲據御

史潘慶瀾奏安徽鳳嶺泗各屬水災過重亟宜速賑一摺本年鳳嶺泗地方二麥被災六月中大雨十餘

晝夜淮河諸水同時泛濫，廬舍一片汪洋，小民蕩析離居，深堪憫惻。著鄧華熙飭屬迅速查明被災分數，分別妥籌賑撫。毋任災黎失所，原摺著鈔給閱看。將此諭令知之。○鹿傳霖奏：「臣於光緒二十三年九月初五日承准軍機大臣字寄，本年八月十九日奉 上諭：恭壽奏土司改土歸流，督臣事前並未商辦，行列銜具奏提督奏開一摺。四川邊務事宜，向由總督會同將軍互商妥籌，合詞具奏。德爾格武土司獻地改土歸流一案，鹿傳霖並未知照。恭壽將該將軍銜名列入與歷來辦法不符，並據該將軍奏請該督不察虛實，即飭委員張繼率師往取其地。張繼急於邀功，遂將該土司全家誘解省監禁，並次提審所供情節，與張繼所稟懸殊。現聞張繼在德爾格武被圍，邊民未必心服，亦可想見。等語。此案實在情形究竟若何？朝廷無由懸度。若如該將軍所奏辦理，實未妥善。國家深仁厚澤二百餘年，各土司食毛踐土，與內地軍民無異。從前用兵查辦之案甚少。此次鹿傳霖在川瞻對，既已用兵三嚴，披桑又復紛紛滋事，雖事勢所值不同，該督等亦應酌度情形，倍加詳慎。乃鹿傳霖咨覆恭壽，有如果辦理不善，該督當獨任其咎之語，事關邊務，豈可掉以輕心，獨斷獨行，設有貽誤，該督能當此重咎耶？恭壽所請嗣後邊務事件，無庸會列銜名，徑由督臣具奏，以一事權亦屬非是。總之恭壽、鹿傳霖共事一方，同受朝廷重寄，均應屏除成見，和衷商辦，俾邊圉乂安，番情悅服，方為不負委任。正不獨德爾格武一事為然也。將此由四

百里各諭令知之欽此等因九月十三日又准軍機大臣字寄光緒二十三年八月二十八日奉 上諭  
文海奏請明德爾格忒土司改土歸流大有後患各摺片本年五月間據鹿傳霖奏稱明德爾格忒小土司  
昂翁降白仁青母子恣行不義業經委員張繼擒獲押解歸廳收禁該老土司及頭目人等獻地歸誠現  
擬改設流官當經諭令妥籌辦理此次文海行抵打箭爐詢問情形始知張繼以帶勇前往察木多查辦  
爲名突入德爾格忒境內誘令該土司及其長子先赴爐城旋將土婦及其少子一併挈獲稟稱勸令獻  
地投誠鹿傳霖飭令將該土司父子夫婦解省審辦道路傳聞莫不駭異以致各土司皆有不安之象等  
情此事鹿傳霖輕聽委員一面之詞輒將明德爾格忒小土司恣行不義老土司情願獻地歸誠即使所奏  
屬實亦祇應將小土司昂翁降白仁青解至打箭爐城派委員查訊明確即可辦結何以又將該老土司  
一併解省到省之後供情若何亦未據鹿傳霖續行奏報情節種種支離自相矛盾以二百餘年恭順之  
土司輒因其家庭細故勒令改土歸流並非出於情願又將其父子解省監禁各土司豈甘心悅誠服辦  
理若此轉涉滋生事端鹿傳霖奉到此旨著卽速將該土司父子夫婦釋放并宣布朝廷德意諭令該老  
土司速回德爾格忒經理該土司事務仍令其長子幫辦一二年後果能稱職卽奏請承襲或可收效桑  
榆慎勿悔過護前仍蹈故轍其改土歸流一節著毋庸議此外如三巖之搶案桑披之命案均應辦理得

宜迅速了結毋使朝廷久厯西顧之憂將此由四百里諭令知之欽此欽遵先後寄信前來仰見 聖主訓誨周詳慎重邊疆之至肅跪聆之下愧悚莫名查 臣昨日將查辦德格營後及老土司病故請予其長子以屯守備飭仍管理其土地而隸於漢官緣由具奏嗣奉 聖旨毋庸改流又復欽遵將土司長子及其家屬分別先後釋回陳明在案所有 臣籌辦德格忒土司詳細情形謹再爲我 皇上稟晰陳之查該老土司側旺多吉羅作彭錯娶藏女爲婦生長子奪吉色額其婦又私通頭人姦生一子卽昂翁降白仁青也該老土司政令無常始而其婦與之不睦繼又有頭人數名爲其所深惡其婦因與此數頭人合謀勾結瞻番官對堆奪吉於光緒十八年帶兵至德通於其婦遂廢老土司置之黑西一隅之地而立其姦生之子爲土司其女子奪吉色額人甚孝謹願隨其父居於貶所於是德格土司遂爲瞻番侵奪迄今已五年矣迨瞻對收復 臣派委員張繼帶營駐瞻彈壓該老土司遣人赴訴於張繼而老土婦及其同黨頭人頓失瞻曾依據內不自安亦冀重帑赴張繼處甘言結納以覘動靜張繼因瞻地甫復事須穩慎遂不動聲色於兩造均善言撫慰各遣之歸一面將詳細情形密稟到 臣當諭以瞻地營後辦妥再酌度情形相機往辦本年二月張繼卽親率弁勇問道馳往先經墨西地方該老土司出見申訴求嚴辦其婦及頭人張繼細詢情形知該老土司與其土婦同黨頭人有不兩立之勢因勸令獻地歸誠俟漢官勘定仍

可予以土職而安其故土該老土司當卽具結允從彼時若不使該老土司暫離其地則其婦及黨惡頭人以為老土司復位必肆意報仇咸懷疑懼難免不糾眾抗拒事轉費手張繼陽為不直其詞先將老土司父子送至臚對暫住得以乘勢直入其官寨挾獲土婦及其逆子一併解臚而安撫其頭人乃得妥籌善後臣以派員往臚對提訊恐難得實故飭令解鑑由鑑解省於老土司父子則置館授餐酌給費需於土婦母子則監禁以示區別原擬訊明分別釋回則往返之間德格善後大局已定臣予老土司以屯守備之職而隸於漢官是該老土司失於臚番之地仍得復保其故土守其宗祀不至始終受制於悍婦逆子既以朝廷仁厚之恩又以扼邊疆形勢之要此臣悉心籌辦之實情特此中情節曲折煩碎勢難一一瑣瀆天聽并非敢以土司家庭細故而勒令改流也臣雖至愚何敢掉輕心而誤邊事顧念藏事孔棘隱憂日甚昔年清邊土司卽因漢官平日漫不經心致令私附於緬甸迫英人據緬遂藉口全行爭佔前鑒不遠今臚對逼近川疆自臚曾橫暴威脅各土司附從以致關外各土司幾不知為天朝屬地今德格老土司既因臚官遇其婦而廢其職呈訴歸誠乘此經營建置文武扼其險要且展修電綫必取道其地以達三十九族而至藏中為鞏固藩籬之計藉以仰副上年奉旨籌設關外設立重鎮之深意庶可以近固川疆遠懾藏衛故不憚苦心經營審度籌辦均經先後奏明在案區區愚忱竊欲固邊陲而

弭後患至謂各土司有不安之象實因謠傳之由則以德格所屬部落名維竹卡者近年爲察木多番僧誘佔其人民土地此次張繼到德派人前往傳喚遲久不至既至尙藉詞狡辯觀望經張繼親往開導亦已聽命息事而察木多之倉儲已恐究其侵地之罪乃布散謠言以惑人心臣當卽出示曉諭安撫各土司勿信浮言卑輕而然無事查從前各土司爲瞻會所每納貢上班時復糾衆出擾與明正年年互鬪各土司之不安實其今則土司反正悉懷天威縱德格改流因謠傳小有不安亦易傳檄而定文海乃謂大有後患臣實不解土司而外附藏番後患實大土司而仍歸內屬後患何有臣提審老土司父子並無怨詞如實係被誘何敢緘默不言番語繙譯供詞往往錯謾幸奪吉色頗能手書番字臣所訊供詞皆其自書存卷可查且德格全境道里賦稅未及兩月均已查清如人心不服何以遵辦若此之易此不待辯而自明難逃聖主鑒察者也

不圖同官之意見未融竟以謠傳已甚之詞成都將軍臣恭壽倡於前駐藏大臣文海和於後以致上座聖主西顧之憂特恐此風一經傳播啟土司之輕藐長藏番之刁風以後邊務更難措手此微臣反躬自咎而亦不能不詳陳實情者也惟文海憚於入藏逗遛經年乃藉繕土司滋事張大其詞巧遂其遷延之計事關川藏大局臣不敢稍涉欺飾可否仰懇天恩迅飭新任督臣來川查明實情妥籌辦理并將張繼一案一併飭交臬公查辦以昭平允之處伏候聖裁至於三



嚴桑披兩事皆從前舊案因關外既謀措置不得不一律經營且巴塘教士甫經重往建堂而三巖野番不時出劫一旦殃及教士又肇禍端故就搶擄之案儘以兵威期免後患刻已據委員裕志文提督韓國秀稟報破其堅巢剿撫兼施不日即可告竣桑披寺則久與夷塘僧俗仇殺案懸多年此次李朝福前往查辦貿然深入嚴詞詰責致激而被戕該寺僧恃險竊喝本自守之賊非出擾劫奪者可比不足以煩大兵惟扼其要隘隨時開導相機誘擒渠魁再行結案仍可徐圖也微臣受 恩深重未報涓埃今以奉職無狀叢集愆尤乃蒙 皇上逾格鴻慈不加嚴譴僅令開缺來京撫衷循省感悚交深惟念川藏安危所關甚重謹將實在情形繕晰上陳不敢稍涉欺飾奏入不報○辛亥 上幸頤和園詣 慈福端佑康頤昭豫莊誠壽恭欽獻崇熙皇太后前請安駐蹕○壬子 上還宮○癸丑廣西巡撫史念祖緣事革職○諭軍機大臣等有人奏蒙古郡王貪殘橫暴據實糾參一摺據稱昭烏達盟長郡王達木林達爾達克以練兵爲名殺掠漢民苛派勒索縱令蒙弁橫行聚斂並有殺死佃民轟斃人命控案又捏稟公主圖謀被焚請款冒銷賄託理藩院越次請補副盟長之缺購買洋鎗浮開價值勒令各旗攤辦請飭查辦等語著陸按照所參各節確切查明據實具奏毋稍徇隱原摺著鈔給閱看將此諭令知之○甲寅諭毓寬等奏估修倉廩需用工料銀兩請飭撥款一摺永濟倉廩庫房間多有坍塌自應及時修理所需工料銀兩

著直隸總督轉飭藩司如數借撥以濟要工○諭毓崑等奏永濟庫租銀各州縣積欠甚鉅請飭嚴催開單呈覽一摺永濟庫每年額徵租銀開放公項均關緊要近年以來各州縣徵解租銀任意拖欠以致不敷給發著直隸總督按照單開數目勒限嚴催迅速補解嗣後不准再有延欠以濟庫儲○孫賦謙奏請武場停試刀石改用鎗礮以備將才得旨著兵部議奏奉部議以士子演習火器有干禁例格不行

冬十月丁巳朔時享 太廟 上親詣行禮○上幸頤和園詣 慈禧端佑康頤昭豫莊誠壽恭欽獻崇

熙皇太后前請安○還宮○鹿傳霖奏川省礦務上年經臣延聘精於礦學之廣東人候選同知唐星球委令前禮部主事捐陞知府曹穗試用知縣呂森會同前往勘明冕寧縣屬麻哈等處金礦可以開採議定官商合辦由成綿道士斌項下撥撥銀十五萬招商集股十五萬共三十萬兩購運機器來川開辦前經奏明在案現已於本年八月運到機器足供開辦之用當飭唐星球前往開辦派委補用道賴鶴年候選知府徐麟光充當礦務總辦一俟試辦果否有效再行詳細具奏此外試辦各處銀銅各礦均無成效惟打箭爐銀礦尙敷工本若以後辦理得法尙可稍有利益又大穴山銀礦據礦師查勘若另設新法改用機器尙可開辦惟機器轉運維艱尙未到齊所有運到機器開辦冕寧縣屬麻哈等處金廠及試辦各礦廠緣由謹附片具陳下所司知之○依克唐阿等奏查奉省每歲額徵不敷充餉全賴各省指撥的

餉協助支放前因開放本年春季內外城兵餉後庫藏久虛一切雜支等款及秋季兵餉無項發放曾經奴才等於五月間開單奏請 飭催各省欠解本年的餉及歷年專餉迅速籌解在案茲查各省共解到丁酉年的餉銀十四萬兩實屬不敷周轉核計山東尚欠地丁銀八萬兩兩淮欠解鹽課銀二萬兩鹽課銀一萬兩江蘇欠解鹽金銀一萬兩其山東河南兩淮淮安關臨清關江蘇直隸等處欠解歷年專餉共計二百一十六萬餘兩不但並未批解且未接有報解之文奉省本年秋季內城兵餉雖已敷行開放係挪東補西移緩就急庫內之款搜羅殆盡不但一切歲需額領雜支欠款待領孔殷並且外城秋餉於九月間開放轉瞬即至而庫藏空虛無項支放奴才等於奏請 飭催外並屢經咨部轉催無如各該省迄未解到若再遲延必致貽誤關繫實非淺鮮奴才等再四籌思萬分焦灼惟有仰懇 天恩俯念根本重地俸餉及緊要急需請 旨嚴飭各該督撫監督等務當共體時艱力籌措注無論如何為難先將本年酌餉於十月內掃數解清並將欠解本年專餉分批源源報解以濟急需而免貽誤得 旨即著戶部咨行各該省迅速籌解○戊午 上幸頤和園請 慈禧端佑康頤昭豫莊誠壽恭欽獻崇熙皇太后前請安駐蹕○調黃槐森為廣西巡撫以徐祥為雲南巡撫○以鄂鴻璣為內閣學士○己未以奎俊為江蘇巡撫○以湯壽銘為雲南布政使興祿為雲南按察使○辛酉陳其璋奏鐵路之興所以為利用便民剋

期致速也津蘆之路成效已昭蘆漢之路接踵興辦此外凡可以通商惠工者固不宜力籌興築期於必成然從未有舍三四里至近之路而弗由轉運道築路三四十里而謂可以求利便如杭州之欲開鐵路者也杭州省城左江右湖爲水所限不能跨錢塘江而至浙東之寧波紹興等處人皆知之乃欲辦鐵路者則爲自湖墅至江頭運貨之說查杭省十門南爲鳳山西南爲清波東南爲候潮北爲武林其武林門外至大關卽湖墅是也山大關進武林門僅二三里有撥船可達城內通江橋至江頭亦止三四里由鳳山清波候潮三門至江頭約一二里二三里不等若貨自浙東渡江而來起撥入城或蘇杭之貨至浙東由大關起運亦不過費二三里四五里之運脚用資不多且自江頭至大關亦片時可達不必鐵路以期速也卽欲速矣應自大關築一路至武林門由江頭築一路至鳳山候潮等門然均止有三四里亦無所用之是以創辦者故迂其途欲由湖墅以達江頭且不言大關而言湖墅以惑當道之不知地理者聞其插標之處皆會正路而不由轉由大關之西南武林之西北折而繞至距城數里之松木塢由彼鑿通西湖背面之山以達於湖再由湖上鑿通小麥嶺繞出省城西南經清波鳳山二門以至江頭經此一繞約有三四十里以三四里一歲可至之路改而爲三四十里迂曲之鐵路雖火輪迅速亦屬有限若謂意在運貨今浙西茶絲由輪船一日夜可至上海由上海一夜可至寧波浙東之貨亦可由輪船以達上海而

欲恃腹地三四十里之鐵路以分輪舟之貨物勢必不能至江西之貨多由九江附搭輪船亦斷未有由錢塘江而來者此皆於事無益於理不通者也然尤有於情不順者一經築路廢田拆屋勢所必然而標識之處墳墓約以萬計臣聞近日杭城徧黏匿名帖士民公議欲與創辦者爲難有拆一屋卽遷於其所居之室掘一墳卽厝於其祖父之塋之語夫果使有益於公家有利於商賈雖民情弗協或不妨強使必從若祇便一二人牟利之私轉而激千萬戶難堪之怒深恐釀成巨禍利未見而害已形地方官當亦不願有此現聞十月間卽要開工爲期已迫民情慷慨訛言日滋可否請 旨電飭浙江撫臣諭令停止非獨免創辦者怨讎之歸酌折之害而 聖恩所被保全實多矣又奏利之所在洋人計之最精在西湖所開鐵路果有大利洋人奚獨不言誠恐喝嚇以圖而吳日並不獲利仍抵牾於洋人則轉不如少此一舉之爲得也如謂怵他人之我先爲此先發制人之計查省城自艮山門沿城行可達東南清泰門至江干不及十里卽宋時之沙河塘也此處地形徑直田廬不多墳墓亦少於省城形勢是弓弦若自西湖一帶則爲弓背合弦就背非智者之所爲也若因杭州新開碼頭非有鐵路不可當就艮山門向東南而爲之其路平坦事半功倍尙屬權宜之計是亦不得已之辦法也 上諭軍機大臣等御史陳其璋奏浙江杭州鐵路有害無利礙情海關請飭撫臣迅卽停止以安眾心一摺所奏各節頗屬詳細如開辦並無大利

自以停止爲是著應轉體察情形據實具奏另片奏杭州如必需鐵路當就艮山門向東南興築事半  
功倍等語著廖壽豐一併查核具奏將此諭令知之○壬戌諭依克唐阿奏查明職官隱漏官款據實參  
辦一摺奉天佐領官清隱匿撥捐以多報少實屬貪劣不職官清著卽行革職仍將漏捐錢文悉數追繳  
以重公款○癸亥山東曹州鉅野縣天主堂德教士二人被殺中德交涉起○乙丑諭各省道府等官之  
賢否向由各該督撫年終出具密考以憑黜陟廣西思恩府知府周天霖前據譚鍾麟奏稱廉明誠篤處  
事安詳史念祖奏稱聲名平常操守難信督撫考語大相懸殊該知府在思恩府任內官聲政績究竟若  
何著黃槐森許振祿確切查明據實覆奏毋得稍有徇徇○丙寅 慈禧端佑康頤昭豫莊誠壽恭欽獻  
崇熙皇太后萬壽聖節 上詣 排雲殿行禮○徐繼畲奏學校所以明人倫而聖人實人倫之至凡在  
典禮不厭求詳謹按 文廟從祀位次東廡先賢孔忠位列狄黑之下相沿已久據家語孔忠本作孔佛  
字子蔑孔子兄子蓋卽孟皮之子子思子之從伯叔父也 臣前任山東黃縣訓導時隨祭 文廟竊見子  
思配饗殿上而孔忠祭於東廡卽疑倫理未順自維不諳掌故又或謂家語爲王肅所依託未敢遽以爲  
請上演 天聰比因按試南陽府接據裕州學正白景新稟以孔忠當移祀 崇聖祠並引 國朝先儒  
前大學士湯斌遺書以爲證 臣按湯斌遺集收入 四庫全書所作潼關衡儒學重建 啟聖祠記有云

子蔑當從顏路曾皙之後移祀於 崇聖祠雁行伯魚可也又云備兵茲土釐正祀典非其職附議以俟  
參採 伏思顏路曾皙並孔子弟子宜從祀兩廡而今入 崇聖祠者因以避其子顏子曾子也孔忠於  
子思固非父子禮曰兄弟之子猶子也以兄弟之子而位列伯叔父之上當非聖賢所安孔子曰宗廟之  
禮所以序昭穆也雖遞降而爲仲伯叔父昭穆秩然序豈容紊昔齊人躋僖公孔子謂之逆祀君臣之義  
不可廢也今躋子思於孔忠之上長幼之節亦恐未順前河南學政 俞樾付於咸豐六年奏請以孟皮  
配饗 崇聖祠仰蒙 俞允誠有合於孔子事兄之道以事長類事兄子思亦猶是心夫以孔忠爲孔子  
兄子是其得闕庭訓與伯魚無異則子思之敬事子蔑亦必如子蔑之敬事孔子非猶夫人之伯叔也既  
已同祀於 文廟則倫次之後先自宜詳爲考定 臣亦知 廟庭鉅典不容輕議變更但與其沿襲舊章  
滋世儒之疑議何若明爲釐正昭倫理之精詳今如本湯斌遺議移祀孔忠於 崇聖祠使昭穆合宜長  
幼有序以妥子思之靈以遵孔子事兄之道似於講學明倫不無裨益合無仰懇 天恩飭下部 臣集議  
施行下禮部議奏○辛未諭朕欽奉 慈禧端佑康頤昭豫莊誠壽恭欽獻崇熙皇太后懿旨此次恭親  
王等承辦慶辰典禮妥慎周詳恭親王奕訢著賞給御書錫福宣猷匾額一方御筆長壽字一張通玉如  
意一柄帶廉貂褂一件金壽字緞四疋慶親王奕劻著賞給御筆長壽字一張通玉如意一柄帶廉貂褂

一件金壽字緞二疋○諭此次 慈禧端佑康頤昭豫莊誠壽恭欽獻崇熙皇太后萬壽慶辰宗親延宴  
綵衣進舞之近支王公恭親王奕訢慶親王奕劻均著交宗人府從優議敘醇親王載灃端郡王載漪郡  
王銜貝勒載瀛載瀾員勒載潤溥偉均著於常年俸銀外加賞銀五百兩員勒銜貝子奕謨貝子溥倫鎮  
國公載澤載洵不入八分輔國公載瀾載漪不入八分輔國公銜鎮國將軍載瀛頭品頂戴鎮國將軍溥  
儀鎮國將軍溥儀頭品頂戴載溥二品頂戴溥偉均著賞給三銀玉如意一柄蟒袍一件○壬申 上選  
宮○以山東曹州殺斃洋人飭李秉衡速派司道大員馳往該處根究起釁情形務將兇盜拿獲懲辦○  
諭饒應祺奏新疆左宗棠專祠請頒匾額等語封疆大吏陳奏事件豈容附會乃饒應祺輒以荒誕不經  
之語登諸奏牘實屬非是饒應祺著傳旨申飭所請著毋庸議○癸酉 上諭 壽皇殿行禮○幸頤和  
園○饒應祺奏回性狡悍多疑謬詐收撫不易安插尤難處置稍不如法則已撫者旋滋事端故欲令反  
側者自安非得人不勝其任也○前奉光緒二十二年三月十七日 電旨賊近就擒恐煽誘良回聯成  
一氣回衆如能捍禦殺匪出力打仗者著破格獎勵以杜勾結等因欽此旋聞滇賊出關有入羅布淖爾  
之信計賊數甚多非以剿兼撫不能能事查有道員用候補知府喀喇沙爾直隸總同知江遇璞循聲  
卓著素得民心尤爲回衆信服當飭於良回中選派明幹篤實紳耆親帶赴羅備備收撫之計又查有英



沙爾營參將李金良由平涼回籍思勇素著調助帶隊入籍兼辦剿撫李金良素知江過璞廉能亦稟稱此事非該丞莫辦也牛允誠既在玉門收撫回衆數千臣委江過璞辦理羅布淖爾安插局務兼營務處會辦剿撫於英格可立等處招僱民匠商撥營勇修築房屋九百七十五間以備撫回棲止與委辦庫爾勒轉運局候補同知閻端陶籌撥糧倉並庫車食糧接濟車食兼備賑需前敵所收難回臣委知府用同知補用知縣柳保元管解赴羅道員潘效蘇復派員分起排解以期周妥玉門距羅三千餘里難民老弱婦孺多係步行委員沿途約束撫綏備極勞苦艱難方山哈密吐魯番遵行陸續到羅而劉四伏已敗竄至和爾罕經李金良等將首各逆擒獲解省其餘男婦五百餘名悉交江過璞安置奏奉七月二十三日 電旨劉四伏就擒辦理甚好羅布淖爾安插事宜著飭該局妥爲布置欽此臣謹飭遵辦江過璞遵將各起撫回分撥房屋撥給地畝農者置於田間商者處於街市發給賑糧暫資餬口因英格可立地土低平旱則蠶收雨則墾多而收歉查有距英兩站英氣蓋河沙土肥美旱澇可收乃於去冬派勇督民開渠放水今春發給籽種撥回二千餘人前來耕種其地不加糞土不事耘鋤而禾苗暢茂倍於他地前據查勘委員回省面稱由東沙灘至英氣蓋河二十餘里麥秀數莖黃雲滿地英格可立與都納里望衡對宇雞鳴犬吠相關商賈不絕於道寂寥荒涼之境頓成人煙輻輳之區回民致稱地土腴美甚於西甫

大有此間樂不思遑之意因將駐羅各軍次第裁撤以節餉需惟留撫標練軍朱義勝馬隊一旗駐防卡  
克里克一帶阿克蘇鎮標左營喀喇沙爾中營步隊二哨幫同工作昨據江蘇璞稟報續修英氣蓋河房  
屋三百三間潤干河大渠四十餘里江古里大渠七里堤壩橋道均已修平二麥收穫秋禾垂成八月底  
可以分別停賑後到八百餘人未及耕種者所需賑糧可就地添採但留屯勇一哨駐防英氣蓋河專司  
屯墾各營哨悉數退出轉運亦可停辦回民樂業安居從未出外生事亦似天留荒隙以處子遺且降康  
年以綏邊庶也江過璞年已七十有三而精力強健馳馬沙磧日百數十里往來經理督墾勸耕夜則清  
釐算糧每至達旦其苦心孤詣潔己奉公籌辦撫綏不辭勞瘁回民相依如父母聽其教養防範可省兵  
力實屬異常出力不讓戰功合無仰懇 天恩將道員用在任候補知府喀喇沙爾直隸廳同知江過璞  
開缺免補知府以道員留新疆補用並加鹽運使銜以示獎勵得 旨如所請行○甲戌以徐用儀兼署  
戶部右侍郎○饒應祺奏關內外去秋奏報肅清股賊悉數撲滅惟肅州南山番地窮巖荒谷間有零星  
殘匪逃竄偷生督臣會報摺內申明實成甘肅防軍設法搜拿並商飭定邊各軍暫留安玉以防出竄去  
冬南山早雪牛允誠派隊進搜未能深入撫回治八个請往招撫立功自贖因與張麻个言語不合被其  
殺害官軍憤甚衝寒躡冰分道進剿人凍馬僵未肯遂愿卒以雪深無路半途折回分隊扼紮各隘口周

陳四張團匪山內使之自斃該匪等凍餓無計正月初二日有馬光才一起三昌馬掠糧經定邊中旗哨  
官王廣山截擊長跪乞命收撫男婦四十九人初五日撫標練軍左營羅福宏據安西探卒報水峽口有  
畧回率隊至奔巴寇圍拿又收撫韓奇幅一起男女四十一人叙供山僻地逃出縣不安等亦在肅南山  
內搜捕數十人牛允誠悉番境餘匪未盡派副將鄒玉祥守備孔福堂挑精騎六十名親帶進關與肅州  
鎮道並羅平安會商派隊裹糧進山分途搜捕縱橫三十餘里直至望牛臺老果均無一匪撫回馬光才  
由玉門解至安西於韓奇幅股內將張麻个認出稟明訊辦據供大通人同夥百數十人悉在山中餓斃  
因殺死治八个恐官兵問罪改名馬有幅混入韓奇幅股內投誠不諱當批正法至南山畧回搜獲淨盡  
涼中零星匪目亦誅戮淨盡矣除飭各軍撤防以節餉糈外所有搜捕零匪最為出力頭品頂戴留新補  
用提督巴里坤鎮總兵利勇巴圖魯牛允誠毅勇撲誠除惡務盡始終勤奮勞苦不辭合無仰懇 天恩  
賞換清字勇號以示鼓勵其餘酌擇員弁併入清單彙獎得 旨覽○乙亥德國海軍少將岱特利菲率  
軍艦三艘突入膠州灣遂奪敵壘據之○長庚等奏奴才長庚前因伊犁各旗營生計艱難地方防務極  
為緊要非興屯墾牧贖械練兵不足以裕邊實咨商新疆撫臣陶模奏撥經費九萬二千兩並經戶部奏  
請自光緒二十年起撥給三年奉 旨允准在案應即遵照部議將籌辦各事妥定章程奏明辦理伏查

伊犁滿蒙各營兵獲後甫經安集生計維艱屯田牧廠久未起復奴才等到任後校閱各營操演尙皆沿  
用舊式四營旗官兵半無軍械可給庫存舊械損壞多不堪用應須鑄鍋帳房金鼓鉤鋤等項概無存儲  
卡倫數十處地廣兵單又無堅堡可資守禦未雨綢繆雖指掘瘠瘠所不敢辭練兵爲當務之急屯牧爲  
根本所繫練兵而不籌生計無以培元氣而固人心籌生計而不固邊防無以安耕鑿而擇牧圍謹就經  
費籌擬酌定應辦事宜十條逐款切實估計總共需湘平銀三十六萬六千二百餘兩除部撥三年經費  
銀二十七萬六千兩尙不敷銀九萬二百餘兩業於本年估餉摺內奏請將光緒二十三年分現存經費  
銀兩展撥一年以資應用應請 旨飭部併案核議如蒙 俞允奴才等惟有實力經理務期辦一事收  
一事之效用一欸得一欸之益斷不敢以至難帑項稍涉虛糜以冀疲弱之區漸臻富強得 旨戶部核  
議具奏○丙子 上幸頤和園詣 慈禧端佑康頤昭豫莊誠壽恭欽獻崇熙皇太后前請安駐蹕○戊  
寅 上還宮○以張百熙爲內閣學士○甲申 上幸頤和園詣 慈禧端佑康頤昭豫莊誠壽恭欽獻  
崇熙皇太后前請安駐蹕○是月日斯巴尼亞國使臣葛絡幹回任

十一月丁亥 上還宮○播江北河運漕糧三萬石賑濟江蘇徐州淮安海州等屬被水州縣○壬辰

上幸頤和園詣 慈禧端佑康頤昭豫莊誠壽恭欽獻崇熙皇太后前請安○還宮○恭壽奏光緒二十

二年七月初五日准兵部咨內閣鈔出前督鹿傳霖奏明川省松建兩鎮驍汛員缺擬請酌量裁併一摺奉 硃批該部議奏軍併發欽此部臣以該督所請建昌屬所裁各缺未將司哨註明松潘鎮屬中營所裁把總司哨亦有錯誤請 飭下督臣詳細查明並具汛防里數清冊暨將來出缺是否查照向章請補抑或變通辦理之處一併聲覆再行核辦六月初十日具奏奉 旨依議欽此欽遵咨行到川等因准此伏查松建兩鎮壤接夷疆所屬汛防在夷地者十居八九邊務安靜因屬員缺閒冗一朝有事仍寬不敷分布現在關外各土司經此次普宣 皇仁雖各感沐安帖而贖鄂朱章之案尚未十分就緒鹿傳霖以時艱餉絀力圖撙節非不知地廣員稀亦屬邊陲隱患所以遲至年餘未敢覆奏者蓋亦慮及於此也且兩鎮裁併千把外委額外五十員之多核計俸餉歲省不過二千餘兩查裁併汛員前督臣曾會列臣銜著以有限之節省增無窮之贍顧邊事關係緊要臣何敢因會銜在前而迴護於後致滋貽誤擬俟將關外土司各案一律完結後再由臣體察情形奏請辦理下部知之○甲午論上年贍對番官越境滋事當諭令鹿傳霖秉公查辦理恩爭端乃該番官膽敢抗違經鹿傳霖派兵剿辦並請收回該地原屬咎由自取朝廷因該番等世受國家深恩厚澤豈竟自外生成恐鹿傳霖操之過盛未足以折服其心特令鹿傳霖開缺派恭壽署理督統諭令持平辦理茲據奏稱當鹿傳霖派員進剿之時該番官等並非有意

抗拒因見大兵臨境疑懼不敢投案仍復固守鹿傳霖誤認官兵官一面之詞遂謂其叛形昭著是以有改土歸流之議前據連賴喇嘛在理藩院呈請賞還地方並覽該署督此次所奏各節是該番官並無叛逆情事尙屬可信朝廷軫念僧番豈肯以跡近疑似遽議收回其地所有三膽地方仍著一律賞給達賴喇嘛收受毋庸改土歸流達賴喇嘛當仰體朝廷覆冒之仁知感知畏力圖自新卽著慎選番官嚴加約束毋得再有酷虐瞻民侵擾鄰境情事致干罪戾其一切善後事宜著恭壽妥爲經理以期永遠相安至德愛格悉朱高竹豁巴塘亭案仍著該署督盡心妥籌次第辦理另片所奏酌刪什土司承襲一案現據該署督將土官釋放並派員前往懋功查辦亦尙中肯著卽迅速辦理毋稍遲延○內中准烏里雅蘇臺將軍開缺回旗○丁酉 上幸頤和園詣 慈禧端佑康頤昭豫莊誠壽恭欽獻崇熙皇太后前請安○還宮○戊戌 上詣 壽皇殿行禮○以貴恆爲烏里雅蘇臺將軍○辛丑張兆蘭奏各省設立常平倉均係領官欸買穀存儲如遇歉收之年減價平糶亦可酌成賑放洵爲有備無患之良法乃奉行既久各州縣移新掩舊挪東補西雖例有盤查多未認真辦理迨至本任交卸不能掩飾始行查參是以各省虧短倉穀之案層見迭出近聞各州縣多有將存倉之穀變價發商生息年年存欸爲數甚多均有案卷可查然掩飾騰挪亦在所不免迨該管上司指欸提用多不能如期報解可否請 旨飭下各督撫通行各

屬將倉穀實在存數若干變價生惠若干每年分別造冊勒限咨報戶部存案不准絲毫挪動一遇荒  
率文指撥即可克期報解庶不至有名無實矣 上諭御史張兆蘭奏各省常平倉穀州縣多有虧損  
飭分年造冊報部等語各省設立常平倉原爲有備無患之良法乃近來各州縣往往移新掩舊挪東補  
西是以虧欠之案層見迭出實屬不成事體著各該省督撫通飭各屬現在實有存穀若干變價生惠若  
干每年分別造冊報部存案以備指撥尅期報解不准掩飾騰挪以重存儲○壬寅 上幸頤和園詣  
慈福端佑康頤昭豫莊誠壽恭欽獻崇熙皇太后前請安○還宮○崧蕃等奏前准禮部咨議覆翰林院  
侍講學士秦綬章奏請整頓各省書院預儲人才一摺光緒二十二年十一月十八日具奏奉 旨依議  
欽此並准鈔錄原奏咨行到滇當經轉行司道遵飭各屬一體遵辦去後查滇省地居邊徼獨只五車育  
材二書院僅課詩文兩項以致讀書之士見聞狹隘光緒六年前督臣王文韶等創設經正書院添課經  
古奏請 頒賜匾額各士子耳目始覺一新然亦只經史雜作共相研求而於天算格致諸學仍無人過  
問不知百者六藝數在其中我 朝定制國子監亦設算學蓋算學爲始治經史所必習抑近今當務之  
急也惟滇省風氣未開學者不知門徑特就省城經正書院隙地創建學會數楹名曰算學館分設章程  
出示招考並慎選精通算學之人主教其中一俟肄業諸生揣摩有得再行添課天文格致輿圖諸學以

期逐漸擴充此外各屬亦據該管州縣先後稟報均於舊有書院添課算學為邊隅開風氣即為 國家  
育人材據雲南布政使裕祚會同鹽法道齊津詳請具奏前來等因覆查無異除咨總理各國事務衙門  
暨咨禮部查照外謹合詞附片陳明下所司知之○癸卯李秉衡緣事解任以裕祚為四川總督○調王  
之春為四川布政使鳳林為湖北布政使裕長為直隸布政使○崧蕃等奏准戶部咨開本部議覆御  
史楊崇伊奏制錢日少請飭各省鼓鑄並雲南銅廠有名無實請另籌辦法等因光緒二十三年六月十  
七日具奏本日奉 旨依議欽此並鈔錄原奏咨行到滇查戶部議覆內稱辦解之銅是否皆由採買唐  
炯督辦礦務是否得力等語臣等查雲南產銅最旺自經兵燹廢弛同治十三年奏請試辦經營十六年  
之久未見成效僅解京餉八起共計八百三十七萬斤有奇自光緒十三年唐炯奉 命督辦礦務以來  
極力整頓招集公司專辦巧家一廠其威寧易門永北維西各廠皆由公司借給貧民油米接濟開採繳  
銅領價計自光緒十六年接運九起頭批起至二十三年此八年中已解過京銅八百七十五萬零均係  
督僱公司辦解並非由外採買惟將重石一處早經奏明採買四川會理州銅添添運解每歲得銅不過  
七八萬斤為數無幾專恃巧家各廠採辦以供京運等伏思前請試辦歷年多而解銅少現今督辦歷  
年少而解銅多彼此相較其有名無實得力與否固可不辨而明所未能週年加批者尚非督辦之不得



力實因連歲災歉米價昂貴加以礦薄工多例價不敷廠民大半折本歇業勢難振興而唐炯公而忘私自備倉并賠累十有餘年身家罔顧惟恐有誤京運稍貢 高厚殊恩獨任艱難不避勞怨嚴催公司加給廠民工本銅價力維礦務歷年以來致令公司賠墊本銀數十萬近年來虧累過多實有不能周轉支持之勢臣等查悉底蘊疊將商民困苦情形奏懇 天恩賞加銅價原以恤商艱而興礦務卽以顧京運而收利權蓋雲南銅礦爲生民養命之源設一旦停辦於 國計固無裨益且滇民無以謀生於地方大有關係卽或民得以自養而銅屬於外將來本省有欲鼓鑄而多掣肘者臣等身膺疆寄共體時艱通籌全局不能不連慮而瀝陳之現蒙 恩准如所請加價商民踴躍集股覓礦遂漸開採惟有會同督辦唐炯欽遵出示推廣招徠加意整飭務期按年加批運京俾供鼓鑄以仰副 聖主足國裕民之至意下戶部知之○乙巳諭陶模奏參副將貪庸不職請旨革職等語甘肅儘先副將李錦恆營務廢弛所部馬步兵多老弱充數並有懸缺不補希圖混冒情事著卽行革職並不准投効各路軍營以示懲儆嗣後各營如有空額卽行奏辦毋稍寬縱○丁未 上御文華殿英國使臣寶納樂覲見○戊申 上詣瀟秀園門恭迎 慈禧端佑康頤昭豫莊誠壽恭欽獻崇熙皇太后還海○貴州學政嚴修奏請設經濟特科以收實用軍機大臣奉 旨著總理各國事務衙門會同禮部妥議具奏○魏光燾等奏臣惟熙於上年四月

十二日會同前護陝西撫臣張汝梅奏請創建格致實學書院一摺五月初七日奉 硃批著照所請該部知道欽此欽遵在案竊維國事待人材而理人材實學校而成不實之求而名是尙其作育與未學同不本之務而求其造就與無材等宗旨既失微特規模剿襲百無一成卽成焉而亦不可恃以爲用臣惟照於去秋試事竣後卽會商臣光霽度地於涇陽縣治前學臣許振禮奏建味經書院之側庀材鳩工昕夕從事委派涇陽縣學各官督理監修茲於十月二十日一律工竣臣惟照親往驗收工料尙屬堅實規模亦覺闡敞四周餘地甚多可爲將來推廣學會及一切講求製造之用擬命名曰崇實書院中分四齋曰致道齋以周易四書孝經爲本儒先性理諸書附之兼考外國教務風俗人情而致力於格致各學以備明體達用之材曰學古齋以書經春秋三傳爲本歷代史鑑紀事附之兼講外國古今時局政治並一切刑律公法條約以備奉使折衝之選曰求志齋以三禮爲本正續三通及 國朝一切掌故之書附之兼及外國水陸兵法地輿農學礦務以培養世經邦之略曰興藝齋以詩經爾雅爲本周秦諸子及訓詁考據諸書附之兼習外國語言文字並推算測量以遞及汽化聲光各學以裕制器尙象之源每齋擬先設肄業生十五名由學臣於歲科兩試調取年二十四歲以內心地誠篤資性聰明之生員分齋肄習將來漸次推廣以每齋四十人爲定額齋學長一人司分教之任至山長一席必須擇識達古今學通

中外之儒方能勝任愉快茲查有主講味經書院 賞加國子監學正銜咸陽縣舉人劉光寶品高學邃  
留心經世於格致各學夙所講求可以兼掌此席將來經費稍充生徒加衆或專訂或另延再當斟酌情  
形辦理至肄業生員擬月給膏火銀二兩五錢每日早起講習中學二時考求西學又二時中有所得則  
以其餘閒撰爲劄記朔望送山長校閱季終送學政評次而殿最焉如有徒事鈔襲毫無發明者斥出每  
月初六日由督撫學政司道各官輪流課試其學業精通才能卓越者應遵總理衙門歷次奏定章程由  
督撫學政會考保送以備器使至此大修造經費係由山原涇陽兩縣及紳富捐集束脩膏火各項則暫  
撥閒款應用俟將來機器紡織局開工後獲有贏餘再爲陸續挹注以資接濟而符原案臣等仍當隨時  
稽查以期成就人材上備 聖朝之採擇下所司知之○已酉以增祺爲福州將軍○總理各國事務衙  
門奏本年正月間接據刑部主事張元濟等呈稱聯合同志分籌款項賃房開館學習西國語言文字請  
發給同文館書籍等因當經照准撥給在案茲於八月二十四日復據張元濟等呈稱設立學堂來學者  
多係京員及官紳子弟現在定立課程先習英文及大算與地其兵農商礦格致製造等學俟洋文精熟  
各就性質所近分門專習伏查二十一年十二月總理衙門議覆御史陳其璋推廣學堂一摺准令官紳  
集資創建奏明辦理今試辦半年規模粗立來學者衆自應援案呈請具奏並據案請將學堂教習比照

成案酌給獎敘暨學堂成業學生仿照廣方言館學生例調考錄取等因。等查近日中外交涉事宜條目日繁需才益亟僅恃市衙門之同文館上海之廣方言館廣東之同文館及南北洋閩廠學堂數處學生有限誠不足應各省之取求前議推廣學堂通行各省酌官紳創辦尙屬寥寥該員等居京師首善之地籌款設立通藝學堂自行講習造就人才留心時務志趣實屬可嘉其所請酌獎教習一節應比照安徽成案略與變通擬俟三年期滿著有成效由該學堂出具考語稟由市衙門核辦有官人員准其保加陞階無官人員准其作爲監生一體鄉試再留三年始終不懈准以府經歷縣丞歸部銓選其成業學生情願投効同文館者應准其隨時報名聽候調考惟必須由該學堂出具憑單將該學生所習何業成就分數考試等第詳悉註明由同文館查核再行調考以防冒濫得旨如所議行○庚戌諭自中東一役以來中外諸臣競言自強之術二年於茲矣現在事機日迫一遇各國交涉之事無不萬分棘手總緣窺我武備廢弛船礮不齊以致強鄰狡焉思啟合以謀我目下欲圖自強自以修明武備爲第一要義惟是出入兩款不敷甚鉅前曾諄諭各該省將軍督撫嚴杜釐金中飽汰減練兵冗數旋據陸續奏並未將釐金中飽之數和盤託出所裁兵勇亦未確查空額茲據剛毅面奏今天下之急莫如練兵籌餉練兵須練可用之兵籌餉須籌常年之餉卽如國初取民有制既無釐金又無雜稅而未嘗患財不多兵不强

今有釐稅及洋藥土藥等課每年增入三千餘萬之多而財轉不敷用者蓋因廣取濫用漫無限制故也  
今欲籌兵餉先由戶部查明咸豐三年以前歲入歲出之款原有入款不准欠原有出款不必裁三年以  
後續增入款曰釐金曰雜稅曰洋關曰土藥續增出款曰勇餉曰購械曰各項經費近年又有借借洋款  
一節應由戶部查明續增入款共有若干續增出款共有若干可裁則裁可減則減務將練勇之空額開  
除釐金之中飽嚴杜餘如鹽場鹽課冗員薪水出使經費機械各局雜支均釐定數目不許濫支濫銷庶  
鉅款不至難籌等語所奏尙屬切實當此需款孔亟之時部臣疆臣自應不分畛域竭力圖維外省用款  
疆吏竄總其成蓋嚴飭在事各員整剔弊端力除中飽尤須正己率屬以期大法小廉應如何認真綜核  
集成鉅款是在該將軍督撫等激發天良認真整頓應即詳細確實覆奏至於嚴查兵勇缺額雖經通諭  
各省不啻三令五申昨復據徐桐摺奏請飭沿江沿海各督撫激厲忠義聯絡鄉團將備之疲軟者速即  
更換營勇之缺弱者趕緊募補減綠營無用之卒以養戰士調內地屯防之旅以固海疆各省將官有老  
於兵事緩急可恃者無論官職大小現任退閒准其一律奏調等語所奏尤爲當務之急著即迅速籌辦  
如有知兵之員爲該將軍督撫等素所深悉者并准其保奏以備干城之選將此由四百里追諭知之○

癸丑冬至大祀 天於 圖丘 上親詣行禮

終

十二月丁巳諭軍機大臣等有人奏湖南已革知縣文策前署太康縣任內催科滋擾文生王璣被差毆辱並不懲辦該縣試時因彈壓諸童令練軍施放鎗礮致斃二命等語著劉樹堂確切查明悉心研訊按律懲辦據實具奏原片著鈔給閱看將此諭令知之○己未 上詣 慈禧端佑康頤昭豫莊誠壽恭欽獻崇熙皇太后前請安○庚申 上詣 先殿 壽皇殿行禮○癸亥 上詣 慈禧端佑康頤昭豫莊誠壽恭欽獻崇熙皇太后前請安○甲子諭軍機大臣等有人奏廣西興安全州一帶匪首至今未獲實因橫州一案辦理不善以致釀成事端梧州太平等關及西江口岸商埠華洋雜處更恐匪類潛滋又聞廣東交界地方會匪出沒無常請飭協同兜拿等語著譚鍾麟黃槐森嚴飭所屬文武員弁將未獲盜犯實力搜捕其通商口岸及兩省交界之區尤應認真拿辦以弭隱患將此各諭令知之○諭張汝梅奏凌汛陡漲利津縣滄家灘隄檢漫溢決口現擬趕緊妥籌堵合請將在事各員暫緩參處一摺本年十一月二十四日山東利津縣地方因連日北風驟冽上流之水挾冰以行凌汛陡漲致將利津道上之姜莊民埝衝刷並將姜莊逼上滄家灘大隄漫決成口刷寬十三四丈水入霑化縣之降河入海此次凌汛肇事據該撫奏稱實因下游水弱凍結成冰人力難施督辦河營各員著照所請暫緩參處勒限一箇月趕緊堵合毋得遲誤○乙丑 上詣 大高殿祈雪○上詣 慈禧端佑康頤昭豫莊誠壽恭欽獻崇熙

皇太后前請安○兵部奏近日各直省各路軍務平時講求操防認真訓練潔已奉公與士卒共甘苦者固不乏人而惟怯懦榜不知檢束濫竽充數之員亦所恆有一經徵調則張惶失措漫無紀律臨陣勢必觀望不前退縮潰逃遺誤事機實非淺鮮雖經各督撫及統兵大臣隨時嚴參治罪事平之後輒復舊緣請託投効各路軍營及河工省分並謀調出洋差使以爲將來開復地步夫此等巧滑劣員畏懦性成一且僥倖復職設遇有事之秋安望其臨陣摧堅蹈踴用命哉是投効及奏調咨調兩途專爲若輩開冀倖之門營伍安能改觀軍事從何整頓等公同商酌凡於臨陣退縮不前赴援不力畏葸無能巧滑逃避獲咎武職人員除已經投効各員姑從寬免其撤回以觀後效並由各督撫及統兵大臣隨時考其是否得力分別去留專案報部外其尚未投効各員擬請嗣後除特奉 諭旨錄用者部遵 旨辦理外其餘概不准投効軍營及河工省分並奏調咨調出洋希圖開復以重名器而嚴軍律經此次定章之後各該督撫等如再將此項獲咎人員濫行錄用部卽分別奏參請 旨交部照例處置如蒙 俞允應俟奉 旨後山 臣部咨行各直省督撫提鎮各路統兵大臣一體祇遵待 旨如所議行○內寅諭軍機大臣等督辦軍務大臣奏請移紮甘軍以資捍衛一摺山陝地方東近畿疆西控關隴形勢最爲扼要革福祥營紮素藩卽著迅速添足二十營之數分紮大慶關平陽府一帶認真訓練務成勁旅以後甘省

防務著陶模實力整頓刻下關內外一律肅清果能就現有之營扼要駐紮足資鎮懾不得藉口兵力單薄稍涉疏虞將此各諭令知之○戊辰以恭修玉牒告成獎敘出力人員內閣侍讀學士崇壽等有差○辛未 上詣 慈禧端佑康頤昭豫莊誠壽恭欽獻崇熙皇太后前請安○壬申諭翰林院侍講學士譚澂奏內務府各司庫等官補缺後例應三年調轉近年以來每有含混留庫弊竇叢生請飭申明定章等語著總管內務府大臣按照定例辦理毋稍含混以杜弊端○癸酉諭給事中丁之斌奏西甯州案內保舉已革山西平陽府通判張心泰前因任意虐民革職陝西揀選知縣舉人楊懋源並未到營等語著吏部查明具奏○乙亥 上詣 慈禧端佑康頤昭豫莊誠壽恭欽獻崇熙皇太后前請安○諭軍機大臣等恭壽奏瞻對蒙恩賞還該達賴自必感激竊恐番官返巢挾嫌報怨尤肆苛虐現雖飭候補道慶晉妥為撫取而番官係由達賴統率恐非漢官所能鈐束請飭文海等就近與達賴約定晉後辦法等語自係為懲前毖後起見文海等身為駐藏大員恭壽所奏情形想亦籌度及此創著與達賴嚴定約章取其慎選番官不再苛虐侵擾確據以期永安相安並著傳諭達賴嗣後番官等倘再滋生事端定惟該達賴是問原片著鈔給閱看將此由五百里各諭令知之○丁丑魏光燾奏自強之道以作育人才為本求才之要以整頓學校為先近年以來內外臣工稟承 諭旨莫不以添設學堂儲才製器為急務光緒二十



二年刑部左侍郎臣李瑞榮奏請推廣學校一案內開各省內地各府廳州縣興格致等學肄習專門果使業有可觀三年後由督撫奏明請旨考試錄用本年二月安徽撫臣鄧華熙奏請各省均於省城另設格致學堂並准奏明指撥的款各等因均經欽奉 硃批允准由總理各國事務衙門咨行在案臣查現在京師設立大學堂天津上海等處奏設頭等學堂其東南各省或另立書院講求機學或就現有書院更變章程綱舉目張均有起色 國家儲才孔亟即在偏隅亦應設法籌辦以收鼓舞振興之效陝省爲文獻薈邦歷代以來名臣大儒輩出我朝深仁厚澤涵濡二百餘年文物之美尤稱極盛近經兵燹原氣未復而關中宏道味經各書院肄業諸生多能研求實學恪守前賢矩矱其間忠義勃發獨除銅習之士亦往往而有良由氣俗質樸士氣果毅故也竊維圖治之本尤以興學育才爲亟亟迭經通飭府廳州縣各就地方書院增設算學格致等課多已漸次遵辦其涇陽新建崇實書院茲已落成經臣會同前學臣趙惟熙奏陳辦理情形在案復據督糧道姚協贊轉據舉人薛信等稟請開設格致書院風氣漸開士知向學自應於省城創建學堂俾得萃羣材益資講習惟開辦之始務須先得要領不可徒託虛名經費既應籌畫章程尤須明定當經檄行司道會商詳覆去後旋據該司道等稟稱現在款項未充難於另建書院擬暫借省城崇化書院房舍創設格致學堂一所名曰游藝學塾本年由署臬司姚協贊於糧

道任內先後捐用經費四千兩以後常年經費並議後任糧道每年籌捐銀一千二百兩又署藩司李有榮詳明由各州縣每年捐銀四千兩又升任藩司張汝梅籌撥生息銀一萬五千兩遴派公正官紳經理興辦延請教習考課生徒一面於津滬各處購買圖書儀器以爲講求製造之用并分立條款安定課程期諸生爭自奮勉擬俟著有成效再請指撥的款三年之後如果諸生學業成就再送總理各國事務衙門考試錄用等情詳請奏明立案前來 臣覆查省會建立書院尤繫人才之消長學術之純疵拘守舊章既滯於通今求由一發其扁鑰徒尙西學又或輕於蔑古不憚自挾其藩籬欲救二者之偏惟有尊崇經訓以端其趨博綜子史以觀其變由是參考時務兼習算學舉凡天文地輿兵農工商與夫電化聲光重汽一切有用之學統歸格致之中分門探討務臻其奧而語言文字尤爲初學階梯亦應設立教習俾知途徑然後本末不嫌於倒置體用亦可以兼賅至於受益有遲速所造有深淺又不外示之升降以寓勸懲驗之製造以定優劣該司等設法措籌創辦要舉實屬先其所急所擬各條亦能因地制宜均臻妥洽核與京師津滬及各省添立學堂辦法尙屬相符從此實力振作漸次擴充知河嶽靈秀之區必有奇才異能奮發而起庶幾仰副 皇上崇尙實學造就人才之至意得 旨該衙門知道○戊寅 上諭 慈福端佑肅頤昭豫莊誠壽恭欽獻崇熙皇太后前請安○上御紫光閣閱賀跋○諭前因山東鉅野縣地

方有盜匪拒捕傷斃教士之案業將兇犯分別懲辦矣開缺四川總督前巡撫李秉衡身任地方不能先  
事預防以致釀成巨案著交部議處交沂曹濟道錫良曹州鎮總兵萬本華曹州府知府邵承照一併交  
部議處鉅野縣知縣許廷瑞緝捕廢弛稟報遲延著卽革職壽張縣有教堂被劫該縣知縣莊維烈著卽  
查參其餘濟寧荷澤單縣城武等州縣亦有民教相爭者該州縣官著分別撤調山東係禮樂名邦士夫  
服習儒術素知自重至草野愚民間有不明事理甚或毀辱教士毀壞教堂此風斷不可長著該地方官  
均行禁戢實力保護並著通諭各省將軍督撫等嗣後如有藉端鬧教堂爲名聚衆生事者卽遵光緒十  
七年六月諭旨辦理倘仍因循玩忽定行嚴加懲處決不寬貸○諭陶模奏甘肅狄道州等處地方民困  
未蘇請蠲免錢糧草束等項開單呈覽一摺甘肅各屬自遭兵燹後民困未蘇本年復被雨雹收成歉薄  
若將應徵錢糧草束等項照常徵收民力實有未遑加恩著照所請所有狄道州巴燕戎格隴河州循化  
廳碾伯大通二縣西寧縣沙泥州判平番縣洮州岷州德順平遠縣莊浪茶馬廳各屬正賦雜稅甘州提  
督課金西寧府雜稅平羅縣馬廠地租共應徵新舊正雜銀一萬九千二百二十六兩零糧三萬六千三  
百四十一石零草二十八萬四千二百五十八束零課金二十四兩均著一律蠲免以紓民力○展辰以  
張宗本著喀什噶爾提督○諭國家設官分職體制相維各部院堂官同辦一事無論重大之件必須互

相商權折衷至當卽尋常應辦事件亦必彼此商酌方昭妥協近聞各部院堂官每多性耽安逸意存推諉並不常川入署卽有一二勤慎趨公者亦無從而相參酌以致公事積壓弊竇叢生奉旨交議事件奏亦多滯滯以此玩愒因循尙復成何事體嗣後各部院堂官務當常川進署振刷精神將一切應辦之事和衷參酌督飭司員迅速辦理毋得稍有遲延至部院衙門胥吏弄文舞弊習爲故常承辦司員往往受其挾制尤宜實力整頓從嚴懲辦毋稍姑容將此通諭知之○諭從來國運之興必由於人才之盛我朝列祖列宗以來無不下詔求賢而諸臣亦必灼見真知始登薦剡所以名臣碩輔代有其人卽至同治間如曾國藩駱秉章等選舉賢才或自藩府或從僚屬其時人才蔚起用能削平大難宏濟時艱向使封疆大吏誠思以人事君之議悉以採訪實力保薦則一時之才自足爲一時之用現值時局孔艱需材正亟各省督撫朝廷資爲股肱耳目其各澄心虛己一秉大公於所屬道府州縣中無論寶缺候補詳加鑒別其各舉宅心正大才識闕通足以力任時艱者列爲上選他若盡心民事通達時務均著出具切實考語並臚列其人之實跡成效詳悉具陳以備擢用倘曠復情由或謬探虛聲保非其人必科原保官以薦舉不實之罪至經武整軍必須寬籌餉餉各省綠營廢弛已久邇來防勇亦多沾染習氣難備緩急著該督撫再行核實裁汰騰出餉項以備添練新軍之用各省製造洋務整捐鹽務等局總辦以外復有

會辦以及司事經管名目繁多每歲虛糜公費不知凡幾往往留國事於不顧而惟爲位置閒員地步密  
卽嚴加核減將節省數目迅速奏聞毋得膠持成見以爲裁無可裁藉詞搪塞○此諭知之○戶部奏  
本年十一月二十五日欽奉 上諭前曾詳諭各省將軍督撫嚴杜盤金中飽旋批陸續覆奏並未將盤  
金中飽之數和盤託出等因欽此○等竊查各省盤金中飽弊在承辦委員不肯和盤託出各省例不應  
支而事非得已者輒於釐稅收款提留濟用所謂外銷者也各省院司類有案存原非自謀肥己然既有  
外銷之事卽有匿報之歟否則從何羅掘無惑乎人言藉藉竊謂各省盤稅實收之數竟數倍於報部之  
數矣現在中飽之弊已奉 上諭飭令各該將軍督撫澈發天良認真整頓各該將軍督撫自不致仍前  
泄沓惟是外銷之數若不和盤託出則盤稅實收之數亦終不能和盤託出○部總握度支各省歲出歲  
入不合藏頭露尾致○部無可句稽卽外銷款目不能驟議全裁亦宜咨報○部權衡緩急庶幾內外一  
氣共濟時艱○督之各省局卡亦援院司報部辦法該將軍督撫其許之否此理之淺近者也擬請 飭下  
各省將軍督撫一面將該省外銷各款數目向來取給於盤稅者據實奏明分別裁減一面將各該省所  
收百貨釐鹽茶鹽土藥釐及常稅雜稅等項銀錢數目據實報部毋事欺飾統限奉 旨後三箇月奏  
咨不得違逾自光緒二十四年正月起按季具報具從前造報不實或外銷浮糜擬乞 聖恩寬其既往

並准將外銷最要之款切實聲明臣部量予留支使無窘於公用惟各省通年進出款項不得再有隱匿傳臣部無隔閡之虞各省免掩著之煩倘經此次通飭之後各省仍有隱匿甚或巧立名目謬稱入不敷出則典守之官不能辭咎臣部亦難曲爲之諒也得旨如所議行○榮祿奏武備之設原期得折衝禦侮之才自火器盛行弓矢已失其利習非所用與文科舉時文試帖之弊略同積習之端未始不由於此雖經朝廷屢次條奏皆以格於成例難議更張查應試武官每縣少則百餘人多或數百人千人不等約而計之縣以二百人爲率合計天下數可三四十萬教練成其利有五年富力強無老弱濫竽充數利一以馬棚習教練易成利二有志上進與謀衣食者不同利三姓名鄉里有籍可稽無逃亡之弊利四有室有家散則歸農不至流爲盜賊利五且近在鄉里養兵之費自輕此尤勝於召募者若每省延聘兼道西法精於操練教習數十人就地教練一歲之後可成精兵足以充役二年作爲武生選其材武聰穎者每省設一武備學堂挑入學習重學化學格致輿地諸學分隊馬隊工程隊諸科限以三年由各省督撫詳加考試凡考列優等者作爲武舉人其名數略參科場舊制分別大省中省小省各不得逾本省原額十分之五此爲武備特科其三年一試之武科暫准照舊舉行但須酌減額額一半以期相濟爲用試之有效再將舊制停罷立將此項特科武舉人咨送京師大學堂限以三年由兵部奏請欽派王大臣考

試分別優等者作爲武進士其名數與常年會試中額各得其半仍恭候 廷試各就本科驗其膂力技藝詢以方略以待衛守備分用屆時並令各路軍營自哨以上均用此項武舉人武進士人員充補俾得効力行間以備干城之選似此參酌中外兵制造就人材其用至廣其效至速各國聞此舉動或稍殷其狡焉思啟之心於國事實有裨益應請 飭下廷臣會議奏請 宸斷施行 上諭榮祿奏請設武備特科參酌中外兵制造就人材等語著軍機大臣會同兵部議奏○壬午 上御中正殿看跳步扎○癸未船祭 太廟 上親詣行禮○甲申 上御保和殿賜蒙古王公筵宴畢詣 慈福端佑康頤昭豫莊誠壽恭欽獻崇熙皇太后前請安○是年統計出口貨直銀一萬六千三百五十萬一千三百五十八兩進口貨直銀二萬零一百八十二萬八千六百二十五兩相抵虧三千九百三十二萬七千二百六十七兩凡徵貨稅銀二千二百七十四萬二千一百四兩

東華續錄

光緒一百四十二

臣朱壽朋敬編

臣潘鴻鼎恭校

光緒二十四年戊戌春正月乙酉朔日有食之○丙戌 上詣 慈福端佑康頤昭豫莊誠壽恭欽獻崇熙皇太后前請安○丁亥 上詣 壽皇殿行禮○先是工部主事康有爲以光緒二十一年中日役後上再力陳變法之不可緩事下各督撫核議施行嗣康有爲屢上書言事格不得達至是 上念國勢岌岌毅然有改革之志知康有爲仇直敢言又因大學士翁同龢之請欲擢用之命總理各國事務衙門王大臣隨時接見康有爲詢問天下大計變法之宜並令如有所見及有著述論政治者由總理各國事務衙門進呈於是總理各國事務衙門以光緒二十三年十一月間康有爲抗論德據膠州亟宜變法自強呈請工部堂官代奏之書進其略曰自馬江敗後法據越南賊於此時嚙愛時事妄有條陳發俄日之謀指朝鮮之患以爲若不及時圖治數年之後四鄰交逼不能立國已而東師大辱遂有割地賠款之事於是外國蔑視海內離心賊變憤迫切謬陳大計及時變法圖保疆圉妄謂及今爲之猶可補牢如再徘徊遲疑苟且度日因循守舊坐失事機則外患內訌間不容髮避之期月事變之患旦夕可致後欲悔改不



可收拾雖有誓者無如之何危言狂論冒犯刑誅荷蒙 皇上天地之量免採芻蕘下驥臣施行以圖臥  
薪膏肓之治 誠感激 聖明續有陳諭格未得達旋即告歸去國二年側望新政而泄沓如故坐以待  
亡土室撫膺閉門泣血頃果有德人強據膠州之事要索條款外廷雖不得其詳 職從海上來聞外國報  
有革李秉衡索山東鐵路礦務俾開章萬元及知縣已爲所擄德人修造礮臺兵房進據即墨并聞德王  
胞弟親統兵來俄日屯買吾米各七百萬日本議院日日會議萬國報館議論沸騰咸以分中國爲言若  
箭在弦省括即發海內驚惶亂民繼以職誠不料昔時變危之論倉猝遽驗於目前更不料極廷緘默之  
風沈痼更深於昔日瓜分豆剖漸露機芽恐懼回惶不知死所用敢萬里浮海再詣 闕廷竭盡愚誠惟  
皇上垂覽而採擇焉夫自東師辱後泰西蔑視以野蠻待我以愚頑鄙我昔視我爲半教之國者今等  
我於非洲黑奴矣昔憎我爲倭倣自覺者今則侮我爲蠻貊矣按其公法均勢保護諸例祇爲文明  
之國不爲野蠻且謂弱誠無政教之野蠻爲救民水火故十年前吾幸無事者泰西專以分非洲爲事耳  
今非洲割訖三年來泰西專以分中國爲說報章論議公託義聲其分割之圖傳徧大地蜚蜚詳明絕無  
隱諱此尙虛聲請言實踐俄德法何事而訂密約英日何事而訂深交土希之役諸國何以惜兵力而不  
用戰艦之數諸國何以饒厚兵而相持號於衆口保歐洲太平則其移毒於亞洲可知文其言曰保教保

商則其垂涎於他利可想英國太晤士報論德國勝事處置中國極爲得宜譬猶地雷四伏藥線交通一處火燃四面皆應膠警乃其借端德國因其嚆矢耳二萬萬膏腴之地四萬萬秀淑之民諸國眈眈聚頤已久慢藏誨盜陳之交衝主者屢經搶掠高臥不醒守者袖手熟視若病膏狂唾手可得俯拾卽是如蟻集墮圓風井至失鹿共逐撫掌歡呼其始壯夫勦其食指其後老稚亦分杯斲諸國咸來并思一櫛者安南之役十年乃有東事割臺之後兩載遂有膠州中間東三省龍州之鐵路滇粵之礦土司野人之邊疆尙未計矣自爾之後赴機愈急蓄勢益緊事變之來日迫一日教堂遍地無刻不可起釁礦產遍地無處不可要求骨肉有限剝削無已且鐵路與人南北之咽喉已絕疆臣斥逐用人之大權亦失浸假如埃及之管其戶部如土耳其之柄其國政樞垣總署彼皆可派其國人公卿督撫彼且將制其死命鞭笞親貴奴隸重臣囚奴士夫踐踐民庶甚則如土耳其之幽廢國主如高麗之禍及君后又甚則如安南之盡取其土地人民而存其虛號波蘭之宰割均分而舉其國土馬達加斯加以挑水起釁而國滅安南以爭道致命而社墟蟻穴潰堤蚌不在大焉恐自爾之後 皇上與諸臣求爲長安布衣而不可得矣後此數年中智以下逆料而知必無解免然其他事猶可先言之若變辱非常則不惟輟簡而不忍著諸竄抑且泣血而不能出諸口慮小朝廷而求活則胡銓所羞待焚京邑而愛惶則董遇所鄙此則 中夜屑涕

仰天痛哭而不能已於言者也夫謂 皇上無發憤之心諸臣無愛國之意坐以待斃豈不宜然然伏觀  
皇上發憤之心昭於日月密勿重臣及大曹九列之賢士大夫愛國之誠殫顏黑色亦且暴著於人顧  
日青自強而弱日甚日思防亂而亂日深者何哉蓋南轅而北轅永無稅駕之時緣木而求魚決無得魚  
之日職請質言其病并粗舉治病之方仲虺之語曰兼弱攻昧取亂侮亡存既自居於弱昧安能禁人之  
兼攻吾既日即於亂亡安能怨人之取侮不知病所而方藥雜投不知變症而方猶守其加危篤固也  
職請以仲虺之說明之歐洲大國歲入數千萬萬練兵數百萬鐵船數百艘新藝新器歲出數千新法新  
器歲出數萬農工商兵士皆專學婦女童孺人盡知書而年歲入七千萬億款乃二萬萬則財弱練兵鐵  
艦無一則兵弱無新藝新器之出則藝弱兵不識字士不知兵商無學農無術則民智弱人相偷安士無  
俠氣則民心弱以當東西十餘新造之強鄰其必不能禁其兼者勢也此仲虺兼弱之說可畏也大地八  
十萬里中國有其一列國五十餘中國居其一地球之迴自明末輪路之盛自嘉道皆百年前後之新事  
四千年未有之變局也列國競進水漲堤高比較等差地勢難隱故管子曰國之存亡鄰國有焉衆治而  
已獨亂國非其國也衆合而已獨孤國非其國也頃聞中朝諸臣祗承平臺閣之習喪薄書期會之常猶  
復以尊王攘夷施之敵國拘文牽例以應外人屢開笑資爲人口實譬凌寒而衣絺絺當涉川而策高車

納侮招尤莫此爲甚咸同之時既以昧不知變而屢挫矣法日之事又以昧不知變而有今日矣 皇上  
堂陛尊崇既與臣民隔絕恭親王以藩邸議政亦與士夫不親并有四萬萬人民而執政行機能通於上  
者不過公卿臺諫督撫百人已自餘百僚萬數無由上達等於無有而公卿臺諫督撫皆循資格而致  
既已裹足未出外國游歷又以貴倨未近通人講求至西政新書多出近歲諸臣類皆咸同舊學當時未  
有年華精衰政事叢雜未暇更事考求或竟不知萬國情狀具蔽於耳目世於齟說以同自證以習自安  
故賢者心思智慮無非一統之說說愚者瞞倨自高實使其口位之私固有以分裂之說來告者傲然不  
信也有以侵權之謀密聞者晏然不察也語新法之可以興利則瞋目而詰難語變政之可以自強則掩  
耳而走避老吏無文稱歷朝之成法悚然聽之者蓋十而六七矣迂儒帖括誦正學之昌言瞿然從之者  
又十而八九矣無一事能究其本原無一法能窮其利弊卽雖從昧國皆失目而各國游歷之人傳教之  
士察我形勝測我盈虛言財政詳於度支之司談物產精於商局之冊論內政或較深於朝報陳民隱或  
更切於奏章舉以相質動形竊屈鄭昭宋聾一以免患一以召禍況各國競處於聰明而我岸然自安其  
愚闇將以求免不亦難乎此而望其盡掃舊弊力行新政必不可得積重難返良有所因夜行無燭瞎馬  
臨池今日大患莫大於昧故國是未定士氣不昌外交不親內治不舉所聞日孤有援難恃其病皆在於

此用是召攻此仲虺攻昧之說可懼也自臺事後天下皆知 朝廷之不可恃人無固志奸究生心陳涉  
輟耕於隴上石勒倚嘯於東門所在而有近邊尤衆伏莽遍於山澤教民過於腹省今歲廣西全州灌陽  
興安寧蘭那地泗城電白已見告矣匪以教爲仇讎教以匪爲口實各連枝黨發作待時加以賄賂昏行  
暴亂於上胥役官差感亂於下亂機過伏卽無強敵之倡揭竿樹木已可憂危况潢池盜弄之餘彼西人  
且將藉口興師爲我定亂國初戡流賊而定都京邑俄人送回匪而佔踞伊犁兵家形勢中外同撥覆車  
之轍可爲殷鑑此仲虺所謂取亂者可懼也有亡於一舉之割裂者各國之於非洲是也有亡於屢舉之  
割裂者俄德奧之於波蘭是也有盡奪其政權而一旦亡之者法之於安南是也有徧據其海陸形勝之  
地而漸次亡之者英之於印度是也歐洲數強國默操成算縱橫寰宇以取各國殷鑑具在覆車可喻當  
此主憂臣辱之日 職亦何忍爲傷心刺耳之談顧見舉朝上下相顧嗟呀咸識淪亡不待中智羣居歎息  
束手待斃耆老仰屋而咨嗟少壯出門而狼顧并至言路結舌疆臣低首不惟大異於甲申亦且迥殊於  
甲午無有結縲背骨慷慨圖存者生機已盡羣色慘悽氣象如此可駭可懼此真自古所無之事夫主於  
公卿士庶偷生苟活候爲歐洲之奴隸聽其犬羊之封縛哀莫大於心死病莫重於瘳癆欲噴之葉不假  
於疾風將萎之花不勞於觸手先亡已形此仲虺所謂侮亡之說尤可痛也然原中朝敢於不畏分割不

憚死亡者雖出於昧亦由誤於有恃焉夫欲託庇強鄰藉爲救援亦必我能自立則犄角成勢彼乃輔車  
若我爲附枝則臥榻之側豈容鼯鼠齊王建終傷松柏李後主終坐牽機且秦西兵事決勝乃戰一旦敗  
續國可破滅俄德力均豈肯爲我用兵或敗大局哉此又中智以下咸知難恃者也如以秦西分割亞洲  
連雞互忌氣勢甚緩突厥頽剝大藩尙延殘喘波斯盡去權利猶存蘭封中國幅員廣袤從容分割緩緩  
支持可歷年所執政之人皆已耆老萬幸一身可免聽其貽禍將來然突厥之回教專爲悍強西人所畏  
吾則民教柔脆而枯朽波斯之國主紆尊游歷西國盡徧吾雖親王宰相閉戶而潛修分局早定民心已  
變瑞典使臣之奔告各國新報之張皇亞洲舊國近數年間歲有剪滅近且殆盡何不取鑑之禍起旦夕  
畢命盡喪而謂少延年載老人可免此又掩耳盜鈴至愚自欺之術也譬巨室失火不操水呼救而幸火  
未至入室竊寶屋燼身焚同歸於盡而已故竊謂諸臣卽不爲忠君愛國計亦當自爲身謀也 皇上  
遠觀晉宋近考突厥上承 宗廟孝事 皇太后卽不爲天下計獨不計及宋世謝后簽名降表徽欽移  
徙五國之事耶近世諸臣泄泄言路鉗口且默矧 朝有一切諱言及事一來相與惶恐至於主辱臣死  
雖粉身灰骨天下去矣何補於事不早圖內治而數十王大臣俛首於外交豈惟束手徒增恥辱而已不  
豫修於平時一旦臨警張皇而求請豈能綢繆徒增賠削而已故膠幣之來不在今日之難於對付而在

向者之不發憤自強也勢弱至此豈復能進而折衝惟有意於退而結網不避斧鉞屢有所陳今日亦不敢言自保言圖存而已亦不敢言圖存卽爲偏安之謀亦須早定規模已耳殷鑒所以啟望外患所以興邦不勝大願伏願 皇上因膠濟之變下發憤之詔先罪己以勵人心次明恥以激士氣集羣材咨問以廣 聖聽求天下上將以通下情明定國是與海內更始自茲國事付國會議行紆尊降貴延見臣庶盡革舊俗一意維新大召天下才俊議籌欵變法之方採擇萬國律例定憲法公私之分大校天下官吏賢否其疲老不才者皆令冠帶退休分遣親王大臣及俊才出洋其未游歷外國者不得當官任政統算地產人工以籌歲計豫算國得失以求進步改良罷去舊例以濟時宜大借洋款以舉庶政若詔旨一下天下雷動士氣奮躍海內絳紫然後破資格以勵人材厚俸祿以養廉恥停捐納汰冗員專職司以正官制變科舉廢學校譯西書以成人材懸清秋功牌以獎新藝新器之能創農政商學以爲阜財富民之本改定地方新法推行保民仁政若衛生濟貧潔監獄更酷刑修道路設巡捕整市場製鈔幣創郵船徙貧民開礦學保民險重煙稅罷釐征以鐵路爲通以兵船爲護夫如是則庶政盡舉民心知戴但天下人心離散當日有恩意慰撫以圖其情志士之志氣劣弱當激以強健衆使以壯其氣然後盡變民兵令每省三萬人而加之訓練大購鐵艦須沿海數十艘而習以海戰 詔令日下百舉維新誠意諄懇

明旨峻切所有新政 詔書雖未推行德人聞之便當退舍但各國兵機已動會議已紛宜急派才望素  
重文臣辯士分游各國結其議員自開新報之館而保太平之局散布論議聳動英日願以爲用此對付  
或可緩兵然後雷厲風行力推新政三月而政體略舉期年而規模有成海內回首外國聳聽矣 皇上  
發誓爲雄勵精圖治於中國何有焉論者謂病入膏肓雖和緩扁鵲不能救火燃眉雖焦頭爛額不爲  
功天運至此無可挽回況普國變法而法人禁之畢士馬克作內政而後立美國製造鐵廠而英人禁之  
華盛頓託荒島而後成近者英人有禁止出售機器於我之說俄法欲據我海關鐵路礦務銀行練兵之  
權雖欲變法慮舉我之肘曠竊以爲不然少康以一成旅而光復桀物華盛頓無一民尺土而保全美  
國況以中國二萬里之地四萬萬之民哉願視 皇上志願何如耳若 皇上赫然發憤雖未能遽轉弱  
而爲強而倉猝可圖存於亡雖未能以敗以成功而俄頃可轉亂爲治猶有三策以待 皇上決擇焉  
夫今日在列大競爭之中圖保自存之策會變法外別無他圖此談經濟者異口而同詞亦老於交涉之  
勞臣所百慮而莫易顧革故鼎新事有緩急因時審勢道備剛柔其條目之散見者當世之士能言之職  
前歲已條陳之今不敢泛舉請言其要者第一策曰採法俄日以定國是願 皇上以俄國大彼得之心  
爲心法以日本明治之政爲政法而已昔彼得爲歐洲所攘易裝游法變政而遂霸大地日本爲俄美所



四庫全書  
五  
追步武泰西改絃而雄視東方此二國者其始遭削弱與我同其後底盛強與我異日本地勢近我政俗同我成效最速條理尤詳取而用之尤易措手聞 皇上垂意外交披及西學使臣游記泰西彙述并經乙覽不廢剗棄若西人所著之泰西新史攬要列國變通興盛記尤爲得要且於俄日二主之事頗有發明 皇上若俛採遺人法此二國誠令譯署進此書幾餘披閱曠旬有日本變政之次第若承 垂採當繕寫進呈 皇上勞精厲意講之於上樞譯諸大臣各授一冊講之於下樞衡在擇施行自易起衰振靡懈廢發矍其舉動非常更有迥出意外者風聲所播海內惴惴可保外人改視易聽必不敢爲無厭之求蓋過昧者其膽蒙見明者則氣怯且慮我地大人衆一旦自強則報復更烈非 皇上洞悉敵情無以折衝樽俎然非 皇上採法俄日亦不能爲天下雄也其第二策曰大集羣才而謀變政六部九卿諸司百執事自有才賢咸可咨問若內政之樞垣外政之譯署司計之戶部司法之刑曹議論之臺諫翰林尤爲要劇宜精選長貳逐日 召見虛己請求若者宜革若者宜因若者當先若者當後謀議既定次第施行期年三月成效必覩其第三策曰繼任疆臣各自變法夫直省以 朝廷爲腹心 朝廷以行省爲手足同治以前督撫樞重外人猶有忌我之心近歲督撫樞輕外人之視我益甚 朝廷苟志存通變宜通飭各省督撫就該省情形或通力合作或專力致精取用新法行以實政目前不妨略異三年要可大

同寬其文法嚴爲齊厲守舊而不知變者片之習故而不能改者去之要以三年期使各省均有新法之練兵數千新法之稅款數萬製造之局數處五金之礦數區學校增設若干道路通治若干粗定課程以爲條格如此則百廢俱舉萬象更新銷萌建威必有所濟我 世宗憲皇帝注意督撫而政舉兵強我文宗顯皇帝 穆宗毅皇帝委重督撫而中興奏績重內輕外之說帖括陳言非救時至論也凡此三策能行其上則可以強能行其中則猶可以弱僅行其下則不至於盡亡惟 皇上擇而行之宗社存亡之機在於今日 皇上發憤與否在於此時若徘徊遲疑因循守舊一切不行則幅員日削手足俱縛腹心已割欲爲偏安無能爲計罔牢羊豕宰割隨時一旦齟齬亦固其所職上爲君國下爲身家苦心憂慮不能免明知疏逃豈敢冒越但棟折榱圯同受傾壓心所謂危急何能擇若 皇上少採其言發奮維新或可圖存宗社幸甚天下幸甚 雖以狂言獲罪雖死之日猶生之年也否則沼吳之禍立見裂眚之事卽來 誠不忍見煤山前事也書上 上嘉納之○命總理各國事務王大臣呈進工部主事康有爲所著日本變政考俄皇大彼得變政考等書○戊子 上詣 慈禧端佑康頤昭豫莊誠壽恭欽獻崇熙皇太后前請安○己丑 上詣 慈禧端佑康頤昭豫莊誠壽恭欽獻崇熙皇太后前請安○庚寅 上詣 慈禧端佑康頤昭豫莊誠壽恭欽獻崇熙皇太后前請安○諭依克唐阿奏蒙古王旗借佔地土藉詞

狡執難辦約一摺博多勒噶台親王旗借地一案事隔多年諸多瑣屑必須確切查明方可核辦著理藩院檢查乾隆四十六年原議案據圖說另派幹員前往查察情形會同該盟長按旗切實開導取具各結由依克唐阿派員幫同換照迅速完結以息爭端○總理各國事務衙門和碩恭親王奕訢等奏光緒二十三年十一月二十三日軍機處交貴州學政嚴修奏請設專科以收實用一摺軍機大臣面奉諭旨著總理各國事務衙門會同禮部妥議具奏欽此○臣等查該副修原奏所陳各節大抵以近世士大夫頗多講求實學而書院學堂之設所成庸僅及於少年新進而耆儒宿學及已經通籍者不入院堂肄業轉無由邀朝廷特達之知因請設經濟特科仿照從前博學鴻詞之例由京官四品以上外官三品以上以及各省學政核實保送不限京官外官已仕未仕一體攷試分別錄用其所擬科立專名不限額數試憑保送嚴查成破資格經費六條辦法籌畫亦頗周密方今時事多艱需材孔亟誠非有破格非常之舉不足以挫外人之視聽而鼓舞海內之人心第原奏請設特科又請設立年限揆之事理竊恐難行夫既曰特科其事固不能歲舉而歲舉之例行之科目亦斷不能概加超擢與以破格之選除朝廷立賢無方議法必通而後久非特科無以動一時之耳目非歲舉無以供歷久之取求二者兼資可分辦而不宜合辦查國朝康熙乾隆年間舉博學鴻詞本依唐人銓目以網羅海內人材唐制舉博學鴻詞者

大抵皆明經進士律算諸科有出身人復經朝官薦送試之吏部優等或竟除給舍若陸麟恩等皆由此以登清要當時號爲得人宋制沿唐所薦送亦皆已山科目出身者若洪邁王應麟諸人皆以進士應舉非布衣所能與也康熙乾隆年間意在訪求遺逸故不限布衣及朝官外職一皆薦送而一時刻服山林之數較倍於摺紳立法因時各收宏效其在於今則宜仿康熙乾隆年間特科舊制甄錄學堂書院外之人材准現今科目階級以登進學堂書院中之優俊一爲歲舉一爲特科先舉特科次行歲舉庶幾傾軋不遺亦且施行有序臣等公同商酌其特科擬略宗宋臣司馬光十科朱子七科之例以六事合爲一科一曰內政凡攷求方輿險要郡國利病民情風俗諸學者隸之二曰外交凡攷求各國政事條約公法律例章程諸學者隸之三曰理財凡攷求稅則礦產農工商務諸學者隸之四曰經武凡攷求行軍布陣駕駛測量諸學者隸之五曰格物凡攷求中西算學聲光化電諸學者隸之六曰攷工凡攷求名物象數製造工程諸學者隸之其保送應請如該編修所奏 飭下京官三品以上外官督撫學政各舉所知無限疆域無論人數悉填姓名籍貫已仕未仕並其人何所專長咨送總理衙門定期攷試再由臣衙門會同禮部奏請試期 欽命題目 簡派閱卷大臣在 保和殿試以策論差次優劣分別去留錄取者再請 殿廷覆試一場另請 簡派閱卷大臣詳定等第以昭慎重覆試後由臣衙門會同禮部帶領引

見應如何量材擢用或悉照鴻博成案略與變通權衡鼓舞出自 聖裁非臣等所敢擅擬應時由軍機大臣請 旨辦理此爲特科或十年而一舉或二十年而一舉統俟 特旨不爲常例此特科議辦之大略也若設爲年限之科則卽以新增講求身藝各書院學堂爲造端之始每屆鄉試年分由各省學臣調取各書院各學堂高等生監錄送鄉會試皆以策問試之初場試專門題次場時務題三場仍試四書文以端趨向中式者另爲一榜名爲經濟正科舉人貢士其體試 殿試 朝考仍與尋常舉人貢士合爲一場同試一題第於卷面另編字號不責以楷法不苛其祇脫一以學問爲高下自不至屈抑真材而亦可免諸生之歧視此爲常科三歲一舉此 臣等就該編修所請攷試年限酌與變通之議辦大略也 臣等竊維學問以磨勵而後成人材以激揚而愈重察看近來風尚上之所求與下之所學精神所注未嘗不並出一途徒以科舉未廢故相需股而相過疏當官每嘆乏材而處士恆嘆不遇誠使不煥 綸音以開賢路風聲所樹羣士響應因風尙以激揚較之藉激揚以開風尙者其勢彌順其程效亦當彌捷拔十得五理可預期惟其間詳細章程或需咨商外省或需參攷舊章斟酌施行茲先將大概辦法恭摺具陳如蒙 特旨允恭候 命下之日再由 臣等分別咨商擬定詳細章程開列清單恭呈 御覽請 旨定奪 上諭總理各國事務衙門會同禮部奏遵議貴州學政嚴修請設專科一摺據稱就該學政原奏分

別酌擬一爲歲舉一爲特科先行特科次行歲舉特科約以六事一曰內政凡攷求方輿險要郡國利病民情風俗者隸之二曰外交凡攷求各國政事條約公法律例章程者隸之三曰理財凡攷求稅則礦務農工商務者隸之四曰經武凡攷求行軍布陣駕駛測量者隸之五曰格物凡攷求中外算學聲光化電者隸之六曰攷工凡攷求名物象數製造工程者隸之由三品以上京官及督撫學政各舉所知無論已仕未仕註明其人何所專長咨送總理衙門會同禮部奏請在保和殿試以策論簡派閱卷大臣嚴定去留詳擬等第覆試後帶領引見聽候擢用此爲經濟特科此後或十年一舉或二十年一舉候有遵行不爲常例歲舉則每屆鄉試年分由各省學政調取新增算學藝學各學堂書院高等生監錄送鄉試分場專攷首次場試時務題三場仍試四書文中式者名曰經濟科貢士亦一體覆試殿試朝考等語國家造就人才但期有裨實用本可不拘一格該衙門所議特科歲舉兩途洵足以開風氣而廣登進著照所議准行其詳細章程仍著該衙門會同禮部妥議具奏現在時事多艱需才孔亟自降旨以後該大臣等如有平素所深熟者出具切實攷語陸續咨送不得瞻徇情面徒採虛聲俟所保人員彙齊至百人以上即可奏請定期舉行特科以資觀感至歲舉既定年限各該督撫學政務將新增算學藝學各書院學堂切實經理隨時督飭院長教習認真訓迪精益求精該生監等亦當思經濟一科與制藝取士並重爭自濯

摩力求上進用副朝廷旁求俊秀至意將此通諭知之○壬辰先是 上諭總理各國事務衙門王大臣等自後康有爲如有條陳卽日呈遞無許阻格並命康有爲具摺上言至是康有爲上疏統籌全局其略曰頃者德人割據膠州俄人竊伺旅大諸國環伺岌岌待亡自甲午和議成後 累上書極陳時危力請變法格未得達旋卽告歸土室撫膺閉門泣血未及三年遂有茲變 萬里浮海再詣 闕廷荷蒙 皇上不棄芻蕘特 命總理各國事務王大臣傳詢問以大計 復命具摺上陳並宣取 臣所著日本變政考俄大彼得變政考進呈 御覽此蓋歷朝未有之異數而 大聖人採及封非之盛德也 臣愚何人受此殊遇遭際時艱敢不竭盡其愚以備採擇 臣聞方今大地守舊之國未有不分割危亡者也有次第而割其土地人民而亡之者波蘭是也有盡取其利權一舉而亡之者緬甸是也有盡亡其土地人民而存其虛號者安南是也有收其利權而後亡之者印度是也有握其利權而徐分割而亡之者土耳其埃及是也我今無士無兵無餉無船無械雖名爲國而土地鐵路輪船商務銀行惟敵之命聽容取求雖無亡之形而有亡之實矣後此之變 臣不忍言觀大地諸國皆以變法而強守舊而亡然則守舊開新之奴已斷可觀矣以 皇上之明觀萬國之勢能變則存不變則亡全變則強小變仍亡 皇上與諸 臣審知其病之所源則救病之方卽在是矣夫方今之病在篤守舊法而不知變處列國競爭之世而行一統世衰

之法此如已夏而衣重裘涉水而乘高車未有不病賜而淪胥者也大學曰日新又新孟子稱新子之國  
論語孝子毋改父道不過三年然則三年之後必改可知夫物新則壯舊則老新則鮮舊則腐新則活舊  
則板新則通舊則滯物之理也法既積久弊必叢生故無百年不變之法況今茲之法皆漢唐元明之弊  
政何嘗爲 祖宗之法度哉又皆爲胥吏舞文作弊之巢穴何嘗有絲毫 祖宗之初意哉今託於 祖  
宗之法固已誣 祖宗矣且 者所以守地者也今 祖宗之地既不守何有於 祖宗之法乎夫使能  
守 祖宗之法而不能守 祖宗之地與稍變 祖宗之法而能守 祖宗之地孰得孰失孰重孰輕殆  
不待辯矣雖然欲變法矣而國是未定衆論不一何從而能舍舊圖新哉夫國之有是猶船之有舵方之  
有鍼所以決一國之趨向而定天下之從違者也若鍼之子午未定舵之東西游移則徘徊莫適悵悵何  
之行者不知所從居者不知所往放乎中流而莫知所依指乎南北而莫知所極以此而駕橫海之大航  
破滔天之巨浪而適遭風沙大霧之交加安有不沈溺者哉今 朝廷非不稍變法矣然 皇上行之而  
大臣撓之才士言之而舉倣效之不以爲用更變夏則以爲變亂 祖制謠謗並起水火相攻以此而求  
變法之有效猶卻行而求及前也必不可得矣 皇上既審時勢之不能不變知舊法之不能不除臣請  
皇上斷自聖心先定國是而已國是既定矣然下手之方其本末輕重剛柔緩急不同其規模條理綱



領節目大異稍有乖誤亦無成功臣愚嘗斟酌古今考求中外唐虞三代之法度至美但上古與今既遠

臣願 皇上日讀孟子師其愛民之心漢唐宋明之沿革可採但列國與統一迥異臣願 皇上上考管

子師其經國之意若夫美法民政英德共和地遠俗殊變久迹絕臣故請 皇上以俄大彼得之心爲心

法以日本明治之政爲政法也然求其時地不遠教俗略同成效已彰推移卽是若名書佳畫墨蹟尙存

而易於臨摹如宮室衣裳裁量恰符而立可鋪設則莫如取鑑於日本之維新矣日本之始也其守舊攘

夷與我同其幕府封建與我異其國君守府變法更難然而成功甚速者則以變法之始趨向之方鍼定

措施之條理得也考其維新之始百度甚多惟要義有三一曰大誓羣臣以定國是二曰立對策所以徵

賢才三曰開制度局而定憲法其誓文在決萬幾於公論採萬國之良法協國民之同心無分種族一上

下之議論無論藩庶令羣臣咸誓言上表革面相從於是國是定而議論一矣召天下之徵士貢士咸上

書於對策所五日一見稱旨者擢用於是下情通而羣才進矣開制度局於宮中選公卿諸侯大夫及草

茅才士二十人充總裁議定參預之任商榷新政草定憲法於是謀議詳而章程密矣日本之強效原於

此 皇上若決定變法請先舉三耆大集羣臣於 天壇 太廟或 御乾清門詔定國是躬甲誓戒除

舊更新與民更始令羣臣具名上表咸革舊習甦勉維新否則自陳免官以激厲衆志一定輿論設上誓

所於 午門日輪派御史二人監收許天下士民皆得上書其羣僚言事咸許自達無須由堂官代遞其  
有稱 旨者召見察問量才擢用則下情咸通羣才輻輳矣設制度局於 內廷選天下通才十數人入  
直其中王公卿士儀皆平等略如 聖祖設南書房 世宗設軍機處例 皇上每日親臨商榷何者宜  
增何者宜改何者當存何者當刪損益庶政重章章程然後敷布施行乃不謬紊近泰西政論皆言三權  
有議政之官有行政之官有司法之官三權立然後政體備以我 朝論之 皇上則爲元首百體所從  
軍機號爲政府出納王命然跪對頃刻未能謀議但爲喉舌之司未當論思之寄若都寺督撫僅爲行政  
之官臂於手足但供奔持豈預謀議且都 臣以守例爲職而以新政與之議事既違例勢必反駁而已安  
有以手足而參謀猷哉近者新政多下總署總署但任外交豈能兼營況員多年老或兼數差共議新政  
取決俄頃欲其詳美勢必不能若御史爲耳目之官刑曹當司法之寄百官皆備而獨無左右謀議之人  
專任論思之寄然而新政之行否實關軍國之安危而言者妄請施行主者不知別擇無專司爲之討論  
無憲法爲之著明浪付有司聽其抑揚惡之者駁詰而不行決之者倉卒而不盡依違者狐疑而莫定從  
之者條畫而不詳是猶範人之形有頭目手足口舌身體而獨無心思必至冥行擿墮顛倒狂瞽而後已  
以此而求新政之能行豈可得哉故制度局之設尤爲變法之原也然今之都寺率皆守舊之官驟予改

革勢雖實行既立制度局總其綱宜立十二局分其事一曰法律局外人來者自治其民不與我平等之權利實爲非常之國恥彼以我刑律太重而法規不同故也今宜採羅馬及英美德法日本之律重定施行不能驟行內地亦當先行於通商各口其民法民律商法市則船則訟律軍律國際公法西人皆極詳明既不能閉關絕市則通商交際勢不能不概予通行然既無律法吏民無所率從必致更滋百弊且各種新法皆我所夙無而事勢所宜可補我所未備故宜有專司探定各律以定率從二曰度支局我國地比歐洲人數倍之然患貧日甚所入乃下等於智利希臘小國無理財之政故也西人新法紙幣銀行印稅證券訟紙信紙煙酒稅礦產山林公債皆致萬萬多我所無宜開新局專任之三曰學校局自京師立大學各省立中學各府縣立小學及專門各學若海陸醫學律學師範學編譯西書分定課級非禮部所能辦宜立局而責成焉四曰農商局舉國之農田山林水產畜牧料量其土宜請求其進步改良焉五曰工局司舉國之製造機器美術特許其新製而鼓勵之其船舶市場新造之橋梁堤岸道路咸屬焉六曰商局舉國之商務商會商學商情商貨商律專任請求激勵之七曰鐵路局舉國之應修鐵路繪圖定例權限咸屬焉八曰郵政局舉國皆行郵政以通信命各省府縣鄉成立分局並電綫屬焉九曰礦務局舉國之礦產礦稅礦學屬焉十曰游會局凡舉國各政會學曾教曾游歷游學各國會司其政律而鼓勵之十

一曰陸軍局選編國民爲兵而司其教練十二曰海軍局治鐵艦練軍之事十二局設庶政可得而舉矣然國政之立皆以爲民政不舉等於具文而已夫地方之治皆起於民而自縣令之下僅一二簿尉維流未寄託以民治縣令任重而選賤俸薄而官卑自治獄催科外餘皆置之度外其上乃有藩臬道府之轄經累四重乃至樞撫而後達於上藩臬道府拱手無事皆爲冗員徒增文書費厚祿而已一省事權皆在樞撫然必久累資勞乃至此位地大事繁年老精衰舊制且望而生畏望其講求新政而舉行之必不可得向者學堂農商之詔屢下矣而各省多以空文塞責亦可見矣日本以知縣上隸於國漢制自郡以太守上達天子我國地大不能同日本官用漢制每道設一民政局妙選通才督辦其事用南書房及學政例自一品至七品京朝官皆可爲之准其專摺奏事體制與督撫平等用出使例聽其自辟參贊隨員俾其指臂收得人之助其本道有才者即可特授否則開缺另候簡用卽以道缺給之先撥釐稅俾其創辦新政每縣設民政分局督辦派員會同地方紳士治之除刑獄賦稅暫時仍歸知縣外凡地畝戶口道路山林學校農工商務衛生警捕皆次第舉行三月而備其規模一年而實其成效如此則內外並舉臂指靈通奉行有準然後變法可成新政有效也若夫加設親王大臣游歷以通外情大譯西書游學外國以得新學厚俸祿以養廉恥變通科舉以育人才皆宜先行者猶慮強鄰四逼不能容我從容圖治

也且我民窮國匱新政何以舉行聞日本之變法也先行紙幣立銀行財泉通流遂以足維新之用今宜大籌數萬萬之款立局以造紙幣各省分設銀行用印度田稅之法仿各國印花之稅我國地大物博可增十倍然後郡縣偏立各種學堂沿海急設武備學院大購鐵艦五十艘急練民兵百萬則氣象丕變維新有圖雖不敢望自強亦庶幾可以自保臣愚夙夜憂國統籌大局思之至詳其能舉而行之惟 皇上之明其不能舉而行之惟諸臣之罪疏入 上命總理各國事務衙門王大臣等會議以聞尋經總理各國事務王大臣及軍機大臣先後奏駁格不行○高燾曾奏 恭讀光緒二十三年十二月二十六日 上諭榮祿奏請設武備特科參酌中外兵制造就人才等語著軍機大臣會同兵部議奏欽此仰見 皇上整軍經武發憤爲雄至意臣不諳軍旅然蒿目時艱竊欲供一得之愚以備芻蕘之採 朝廷推設特科自與尋常武備迥異若但較量技勇卽成就可觀不過得一兵之用而止擬請 飭下軍機大臣等詳議章程始也求之有道寬其途嚴其格不拘已仕未仕總以能勝將帥之任爲指歸令內外三品以上大員各舉所知應五事以爲之的一嫻韜略兼識中法西法二熟輿地工測繪三練身體善擊刺四習洋鎗洋礮及中國擅長火器此四者闕一不可五精製造創新械此則於四者之外別爲一格或專長或兼長皆可保薦其有名實相符者詳具姓名以 聞至京攷校合格者分別給予職官俾爲武備學堂教習教

有成效准予超擢由是而教之方可言矣京師設武備學堂遍及於各行省亦教以上所陳五事外省兩年報滿拔其尤入京師武備學堂仍令肄習一年三年學成請 欽派王大臣一體攷校分別等第以備任使或充各營教習或充哨官營官其穎異者令充出使大臣隨員以廣聞見卓著勳勳乃升統帶似此條理略具但使王大臣各躬吏勳勳懇實事求是勿徇情面勿尙酬應日漸月摩必有名將出乎其間上諭給事中高燾曾奏請設立武備科一摺著軍機大臣會同兵部歸入榮祿奏請參酌中外法制特設武科片內一並議奏○癸巳訖思永奏竊維時事孔棘庫藏空虛舍借款無以應急舍外洋不得巨款前已種種嘆嚅近聞各國爭欲抵借其言愈甘其患愈伏何中國臣民如此之衆受 恩如此之深竟無以借藉欸之策進者若謂恩借商欸前無成效且有擾民之弊遂不可行此誠因噎廢食之說也不知在外洋與在通商口岸之華民依傍洋人買票借款者甚多不能自用乃以資人且摺紳之私財寄頓於外國銀行或託名洋商營運者不知凡幾存中國之銀號票莊者又無論矣小民不足責應請 特有嚴責中外臣僚激以忠義奮發之氣先派官借以爲民倡合天下之地力人力財力類別區分各出其餘以應國家之急似乎四萬萬之衆不難借一二萬萬之欸臣聞外洋動輒以萬萬出借非其素蓄不過呼應其靈每股百兩且有折扣甲附股以售與乙反掌間即可加增以爲恆產傳之子孫者不願歸還卽輾轉

操縱亦有贏餘股票勝於銀票故舉國信從趨之如鶩每聞中國電報借款議成卽由銀行造票登新聞  
紙出售雖萬萬兩之多尅期立盡中國風氣若開豈難漸收成效擬請 勅下戶部速造股票先按官之  
品級缺之肥瘠家道之厚薄酌定借款之多少查照官冊分派漸及民間亦仿西法每日兩爲一股每股  
分期收繳還以十年或二十年爲度每年本利共還若干預定准數隨股票另給票據十年則十張平時  
准其轉售臨期准抵交項蓋分期寬則交款易交款易則股本方肯多入歸款亦不爲難出入皆就近實  
成銀行票莊銀號典當代爲收付不經胥吏之手無詐無虞確有憑信可替可抵吏易流通大抵鄉間通  
緩急集腋乞鄰視爲常事況在軍國之重 君父之尊苟有天良安忍推諉特不用力者舉一羽而不足  
不同道者拔一毛而不爲誠能人人以謀身之智謀 國智不可勝用矣人人以爲己之力爲公力亦不  
可勝用矣其實聚之爲多分於一人所用其智力者亦無幾若慮激之不勸倡之不應督之不前是真可  
與共富貴而不可共患難者當不至此 臣謂先派官借者亦鑒於因循之習已深又恐因噎廢食依然徒  
託空言耳抑或能借巨款給獎敘以資鼓勵亦是一法頃奉 上諭開經濟特科既重專門之學求應變  
之才斷非空談名理徒習虛文凡一切講武訓農通商惠工之實事刻不容緩需款正多會已求人終不  
可恃無論洋款如何華款總當併力圖之專責任之尅期待之志在必成 臣愚揆度時勢非急求所以自

強者無以自立非反求所以自足者無以自強足食足兵爲自強之本民信又爲兵食之本我朝深仁厚澤民志尙乎於此次借資民力之盛務須格外核實格外認真有言必踐無弊不除人人曉以休戚相關之理人人動其忠君愛國之忱內有可恃外自不敢生心不待兵食既足卽此民信之先聲出人意外已足震而驚之矣縱借洋欸思必較輕洵爲今之急務故借華欸股票謂之自強再中國集股之舉慣於失信人皆望而畏之卽鐵路銀行開礦諸大端獲利亦無把握收效未卜何時故信從者少若因國計自強派股皇上昭示大信一年見利既速且準自非尋常股票可比安見將來風行之盛不如外洋如蒙聖明採納臣非空言請先派籌借若干兩定限繳齊逾期請治罪其力數倍於臣數十倍於臣者如恆河沙數聚沙成塔祇在人爲惟懇皇上宸斷令出惟行則傾風可振衆志成城轉弱爲強之機反求卽是矣得旨著戶部速議具奏○甲午時享太廟上親詣行禮○上詣慈福端佑康頤昭豫莊誠壽恭欽獻崇熙皇太后前請安○上御紫光閣賜蒙古王公筵宴○乙未諭吏部奏遵議處分一摺山東巡撫李秉衡於鉅野一案事前未能防範追總理各國事務衙門電查始行奏陳實屬咎有應得李秉衡著降二級調用不准抵銷調任兗沂曹濟道錫良撤任兗州鎮總兵萬本華曹州府知府邵承烈均著革職留任泰西各國傳教載在約章該教士萬里遠來中國官民自應加意體恤乃山東鉅野縣竟



有盜殺教士二人之案殊堪惋惜除兇犯按律懲辦外准令設立教堂三處在房七所以示朝廷憫惜連人至意嗣後著張汝梅飭屬實力保護倘再有不逞之徒滋事騷擾惟該地方官是問懷之○諭前因御史崇蔭奏昭烏達盟長郡王達木林達爾達克以練兵爲名殺掠漢民苛派勒索縱令蠻弁橫行聚斂並有殺死佃民毆斃人命控案又捏稱公主圖寢被焚請款買銷賄託理藩院越次請補副盟長購買洋鎗浮開價值勒令各旗攤辦各節當經諭令壽薩確查茲據查明覆奏被參各款均係屬實該盟長種種荒謬實出情理之外達木林達爾達克著先行革去盟長交理藩院看管聽候查辦摺內所稱巴咱爾濟里第充補副盟長有越次賄託情事並所查各款著派榮祿剛毅確切訊明據實覆奏○丙申 上諭 大高殿祈雪○上詣 慈禧端佑康頤昭豫莊誠壽恭欽獻崇熙皇太后前請安○以景星爲山西按察使○諭本日御史王廷相奏條陳時務一摺臚列七條語多臆度不切事情卽如所奏徐致祥浙江差滿改調安徽外似優隆實則屏絕等語朝廷用人行政一秉大公權操自上本非臣下所能干預該御史輒以偏見窺測尤屬冒昧王廷相著交部議處○丁酉 上詣 慈禧端佑康頤昭豫莊誠壽恭欽獻崇熙皇太后前請安○戊戌 上詣 慈禧端佑康頤昭豫莊誠壽恭欽獻崇熙皇太后前請安○戶部奏軍機處交出右春坊右中允黃思永奏籌借罰款請造自強股票一摺光緒二十四年正月初九日奉 諭旨

戶部議具奏欽此據原奏內稱時事孔棘庫藏空虛會借款無以應急舍外洋不得鉅款前已種種嘆  
斷近聞各國爭欲抵借其言愈甘其患愈伏何中國臣民如此之衆竟無以借華款之策進者若謂思借  
商款前無成效且有擾民之弊遂不可行此誠因噎廢食之說也在外洋與在通商口岸之華民依傍洋  
人買票借款者甚多不能自用乃以資人且搢紳之私財寄頓於外國洋行或託洋商營運者不知凡幾  
存在中國之銀號票莊者又無論矣小民不足責應請 特旨嚴責中外臣僚激以忠義奮發之氣先派  
官借以爲民倡合天下之地力人力財力類別區分各出其餘以應 國家之急似乎四萬萬民之衆不  
難借一二萬萬之款聞外洋動輒以萬萬出借非其素蓄不過呼應其響每股百兩且有折扣甲附股以  
售與乙反掌間即可加增以爲恆產傳之子孫者不願歸還即輾轉操縱亦有贏餘股票勝於銀票故舉  
國信從趨之若鶩每得中國電報借款議成即由銀行造票登新聞紙出售雖萬萬兩之多剋期立盡中  
國風氣若開豈難漸收成效擬請 敕下速造股票先按官之品級缺之肥瘠家道之厚薄酌定借款之  
多寡查照官冊分派漸及民間亦仿西法每百兩爲一股每股分期收繳還以十年或二十年爲度每年  
本利共還若干預定準數隨股票另給票據十年則十張平時准其轉售臨期准抵交項蓋分期寬則交  
本易交本易則股本方肯多入歸款亦不爲難出入皆就近責成銀行票莊銀號典當代爲收付不經胥

吏之手無詐無虞確有憑信可舊可抵更易流通抑或能借鉅款給獎敘以資鼓勵亦是一法臣非空言請先派籌借若干兩定限繳齊逾期請治臣罪其力數倍於臣數十倍於臣者如恆河沙數聚沙成塔祇在人爲惟懇 皇上宸斷令出惟行則頌風可振衆志成城轉弱爲強之機反求卽是等語臣等伏查日本債款數鉅期迫原擬息借洋債以應急需乃需用愈急息借愈難或已有頭緒而不免紛紜或已立合同而終成反計計自去年以迄今日借債一事其旋議而旋停者蓋不知凡幾矣現在期限日緊洋債仍無成說臣部正議息借華款爲補救萬一之謀今中允黃思永請 特有嚴責中外臣僚激以忠義憤發之氣先派官借以爲民倡並請速造股票先按官之品級缺之肥瘠家道之厚薄酌定借款之多少查照官冊分派漸及民間亦仿西法每百兩爲一股每股分期收繳還以十年或二十年爲度每年本利共還若干預定準數隨股票另給票據十年則十張平時准其轉售臨期准抵交項等因自屬籌款之一法第缺分肥瘠家道厚薄一時既難周知且按官之品級以定數之多少亦恐跡近抑勒窒礙難行臣等會同商酌擬令官紳商民均量力出借無庸拘定數目先由臣部印造部票一百萬張名曰昭信股票頒發中外隨後再製造憑摺給予本人收執每部票一張註明庫平紋銀一百兩銀圓亦准折合抵交凡中國官民領取部票繳納借款或在部庫海庫兌交或寄存某字號票商但使無誤提撥均聽其便此項借款照

洋款辦法周年以五釐行息計用二十年前十年每年還息一次後十年本利並還期以二十年本利完  
訖在京由部庫發給在外由藩庫發給斷不准絲毫需索平時股票許其轉相售賣每屆還期准抵地丁  
鹽課釐金以冀通行而昭大信夫商民食毛踐土各懷忠義之心而內外大小臣工受國厚恩際此帑  
絀時艱尤當熟計安危出家資以佐國用況朝廷不責以報効不强令捐輸一律按本計息分期歸還  
誰無人心誰無天良斷不忍觀望遲回一任大局之潰裂該中允原奏先派官借以爲民倡所論誠爲扼  
要擬請 降旨飭令在京自王公以下在外自將軍督撫以下無論大小文武現任候補候選各項官員  
均領票繳銀以爲商民之倡在京大小官員出借銀若干應領崇若干由該旗該衙門開單報部請領轉  
發在外大小官員出借銀若干應領崇若干由各省將軍督撫開單請領轉發至地方商民人等願借者  
亦復不少在京卽責成順天府尹在外卽責成將軍督撫將部定大概章程先行出示隨即揀派廉幹  
之員剴切曉諭勸令紳商士民一體量力出借仍不得苛派勒捐致滋紛擾一面由部將印票分別省  
分酌量給發一面由地方官將出借銀數隨時報部聽候撥還日本償款無論何項不准挪移動用此項  
借款待用孔亟各省應自奉 旨之日起限兩箇月內將籌借辦法及已借銀數趕緊電報不得稍有  
遲遲如派辦籌借人員多方勸諭能借巨款十萬以上准從優獎五十萬以上准破格優獎以示鼓勵

上諭戶部奏遵議右中允黃思永奏籌備用款請行股票一摺據稱按照該中允原摺所陳詳細參酌擬飭部印造股票一百萬張名曰昭信股票頒發中外周年以五釐行惠期以二十年本利完訖平時股票許其轉相售買每屆還期准抵地丁鹽課釐金在京自王公以下在外自將軍督撫以下無論大小文武現任候補候選官員等均領票繳銀以爲商民之倡其地方商民願借者卽責成順天府尹及各直省將軍督撫將部定章程先行出示並派員剴切勸諭不准稍有勒索承辦之員能借巨款者分別優予獎敘各等語著依議行當此需款孔亟該王公及將軍督撫等均受朝廷厚恩各省紳商士民當亦深明大義共濟時艱況該部所議章程既不責以報効亦不强令捐輸一律按本計利分期歸還諒不至遲回觀望也將此通諭知之○己亥 上詣 大高殿 壽皇殿行禮○諭王公文武大臣同受朕恩際此時事多艱卽使勤慎趨公力圖振作猶恐不足以資治理乃近來告假人員幾於無日無之雖其中亦實有因病陳請者而藉詞飾說希圖安逸者亦復不少且每遇 壇 廟大祀及致祭 陵寢之差先期請假人員尤多並有分獻及各項執事人員業經派出臨時又復告假承辦衙門屢次奏請改派似此任意懈弛尙安望夙夜在公克勤厥職耶嗣後該王公大臣等倘有仍蹈積習無故告假既派差使以後託病請假者朕查出定必予以懲處勿謂不戒視成也懍之○諭上月三十日曾經剴切曉諭各直省將軍督撫將

裁兵節餉等事迅速辦理連日復據依克唐阿劉樹堂恭壽先後奏到著通行各將軍督撫欽遵迭次諭旨卽將此項加緊籌辦迅速覆奏以慰廬系○庚子依克唐阿奏據辦理鳳遼安東等處礦務鑲黃旗漢軍副都統榮和稟稱遼陽界內青山背一帶爲產礦之區現已派知縣用山西候補經歷韓炳文招集官商資本銀四千兩採煉礦沙成色甚佳擬請每提歸官中若干外卽在奉天營口等處設局售礦抽稅又據辦理錦州府屬礦務升用佐領世襲雲騎尉成顯稟稱府屬大北嶺筆架山黑漁溝白楊水溝等處礦礦苗綫暢旺在大北嶺試採燒礪色碧質精最爲上品非東西洋出產所能及現在招股銀五千兩擬再續募銀一萬五千兩以資暢辦並分路設局銷售各等情先後報明前來奴才查硫磺一物爲製造軍火所必需今該副都統等所稱遼陽各處硫磺甚佳亟應及時開採以濟軍需而收利權惟奉天向設官礦竊商人資薄採少照章抽釐爲數甚微自宜稍予變通奴才擬於奉天省城設立官礦總局錦州營口並天津吉林齊齊哈爾各設分局將各處所出之硫擇其最精美者按成提留備造軍火餘硫悉歸局中銷售如蒙 俞允卽由奴才咨明吉林黑龍江各將軍及直隸總督查照以廣銷路一面仍將設廠設局並充公礦數妥議詳細章程奏明立案下戶部知之○辛丑祈穀於 上帝○癸卯予故追贈太僕寺卿廣東潮州府知府吳均於潮州府建祠事蹟交國史館列入循吏傳○甲辰戶部奏黑龍江副都統景祺奏

請專設鋪稅藥牙以清償欸一摺光緒二十三年十二月十八日欽奉 諭旨戶部議奏欽此欽遵出軍機處鈔交到部據原奏內稱天下有可收之利而舉辦不致騷擾者厥有二端一曰鋪稅將市廛鋪戶竭其契實之稅而令按間納稅大致以深廣一丈爲一間每間歲徵鋪稅錢自五百文至三百文爲率其鋪略分上中下三等如鹽典綢布金銀皮張藥材等鋪爲上等米麵醬料油糖煙酒雜貨等鋪棧爲中等手藝工作等鋪店爲下等上等每間歲稅制錢五百文中等每間歲稅制錢四百文下等每間歲稅制錢三百文行令各直省將軍督撫府尹酌量情形或責成地方印官或另委妥員照例開辦一切薪水公費仿照釐捐章程不得過十成之一正稅之外不得復有絲毫規費在商賈所出稅項上等極大之鋪每年不過數千文下等極小之鋪每年僅止數百文於四季二首分徵開設及開歇者仍按開閉月日報明起止似此出諸商賈者爲數甚微裨於帑藏者已數百萬矣一曰藥牙查洋藥土藥一項爲害無窮而民間沾染習用幾與米鹽無殊其初懸爲厲禁既刑法之俱窮其繼並徵稅釐又外域之梗阻此外如膏捐燈捐或行之未效或微漫難稽所收甚微無濟實用而洋人之寄居我國者則香港收膏捐矣上海收燈捐矣商民出於其途奉法維謹其故何也則以我之章程未得以簡馭繁之要也奴才以爲 國家鹽法其權一操於官其課爲天下最今略師其意行令直省州縣於城市鄉鎮概設洋藥土藥行牙分爲引地預釐

部帖交各州縣正印官稽徵凡售賣洋藥土藥必須請領部帖方准行銷如無票私銷貨房全數入官仍照十倍科罰平日卽令有帖之牙自相查詰稟官罰徵每帖一紙分繁盛次盛簡僻爲三紙繁盛者徵銀一千兩次盛者徵銀五百五十兩簡僻者徵銀五百兩一年例換一次卽納稅一次承充之後凡有洋藥土藥交易悉由該牙經手約取用錢並准該牙自行營運販賣獨專其利如一縣而有數行則一行各有一牙無論買賣多寡均勻分利若止一行則歸一牙承辦惟不准一縣境內不設一牙分居他縣之人不得購用此縣之藥違者以十倍徵罰又洋土兩藥熬膏出售則另設煙膏部帖每帖一紙亦年繳牙稅分繁盛次盛簡僻三等繁盛者歲徵銀五十兩次盛者歲徵銀四十兩簡僻者歲徵銀三十兩設帖之後始准開燈賣膏私開者立予查封房貨入官仍十倍追罰所繳膏費准由地方佐雜或委員經徵仍收加一部飯公費加一費內以一成解部其餘九成歸經徵員役各項用費以上繁盛次盛簡僻請以二千戶以上爲繁一千戶以上爲次五百戶以下爲簡僻若合二十二省并計歲入不下千萬奴才伏思理財之要在乎得人得人之方務在給其所求養其廉恥故公費之給必資十一成之一乃可杜意外之需索無意外之需索則商民易知易從雖取之而不爲虐其有取於什一之外者應請特設專例輕則流遣重則軍法並各予查抄如果成效昭然亦立卽擢升序補不託空言蓋 朝廷取衆之權端在信賞必罰理財用



人治軍飭吏無不由之是在部臣堅意持之於內疆臣實力奉行於外各等語臣等竊維時局艱難償款既未能全清洋債復無從再借而一切應行籌備緊待支之款更復紛至沓來所賴中外大小臣工目擊阨危共籌利濟本年正月臣部因償款期迫數鉅是以議准籌借華款頒發昭信股票由京外官員提倡爲商民先臣部忝領度支亦知天下財力有限斷不忍過爲搜括重困商民故凡籌餉銷餉總期無損於民有益於國此臣等持籌之苦衷可爲天下共諒者也該副都統所陳鋪稅藥牙兩端亦謂天下有可收之利而舉辦不致騷擾並期臣部持之以堅疆臣行之以力臣等詳加參酌鋪戶納捐一事卽古人鹽法遺意光緒二十二年湖廣督臣張之洞曾行之於漢鎮咸豐同治年間京師及江蘇廣東各省亦均有行之者大致按鋪戶租價之多寡按月各酌提租銀數成納之公家夫房主按月憑摺付租住客按月憑摺交租其租價自必確有可據若如副都統之所奏按間架之大小廣狹及商人所業工藝強分三等不特辦公繁難易滋難擾且恐叢生弊混轉開胥吏需索之門應請旨飭下順天府府尹及各省將軍督撫遴派妥慎之員會同地方印官查明城廂市鎮各有鋪戶行店若干無論資本之重輕獲利之厚薄與夫間架之大小廣狹均按所賃房屋租摺每月實繳銀數自本年四月初一日爲始於十成租價內酌提一成歸公此一成內房主與租客各占其半如每月租價十兩提銀一兩房主與租客各出銀五錢按

月彙集或由地方印官查收或另派員分收該員等應領薪水准由該管上司於所收租價內酌量提給  
惟不得於此外復有絲毫規費等以杜弊端此外自行蓋造鋪屋但係經商雖無租捐亦應比照同行所  
繳銀數照收一成一俟洋款本息還清再行酌量停止至洋藥土藥一項迭經臣部會同總理衙門奏請  
整頓並奏令各省於土藥出產之地照每擔六十兩之數徵收先後據各省聲覆或已照數開徵或請暫  
從緩辦或有原收稅釐之外加抽二成或照抽地稅之法加收收稅至商賈營運之後煙土如何行銷熟  
膏如何售賣應否再行收稅臣部實未議及現據該副都統聲稱凡售賣洋藥土藥必須請領部帖方准  
行銷熟膏出售另設煙膏部帖大致分整盛次盛簡僻三等責令牙行按年領帖納稅細釋原奏亦以此  
等藥物爲害無窮猶是借徵爲禁之心多取誠不爲慮應請 旨飭下順天府府尹及各直省將軍督撫  
按照該副都統所陳各節查明各城廂市鎮售賣洋藥土藥及出售煙膏各行店共有若干分別地面繁  
盛次盛簡僻三等迅卽酌定章程報部自本年四月起一律分設牙行請領部帖各省地方有司及印委  
各員自應共體時艱秉公辦理如有抑勒苛派浮收侵蝕及縱容家丁吏胥藉端訛索或包庇徇隱等弊  
一經查出應卽從嚴治罪該商等食毛踐土具有天良際此時艱自必盡力樂捐以濟公家之急一俟各  
省辦有端倪通計全省能收銷捐若干藥牙稅銀若干均限本年三月概行據實覆奏不得藉詞推諉延

宕致誤要需得 旨如所議行○乙巳總理各國事務衙門奏光緒二十三年十二月二十六日江蘇補用道容閔呈稱由天津經山東德州至江蘇之鎮江府爲南北往來孔道必宜專築一路以爲便民興利之圖現值德人藉口教案欲修軌道直達濟南倘我先造南北幹路則德人修路至濟南後令其就近與我幹路聯接使不能再加展拓最爲要著是自修津鎮鐵路實爲抵制之方利權固在所必爭大局尤刻不容緩擬卽糾合富商巨賈集成鉅款興築由天津達鎮江幹路懇請奏明准照光緒二十一年十月間諭旨由該道自行設立公司假以事權俾得從速集資開辦以廣利源並附呈章程二十二條等因臣等查鐵路之設無事用以通商有事用以轉運泰西各國鐵路縱橫四達密如蛛網用收富國強兵之效中國蘆漢鐵路經大理寺少卿盛宣懷遵 旨籌辦勘路籌款漸有端倪若照該道客閔所請再造津鎮幹路一枝則展拓愈廣實足與幹路相輔而行且可預杜外人覬覦之漸所呈章程二十二條臣等詳加酌覈亦均妥協惟所稱招集洋股一節應令改爲籌借洋款仍聲明商借商還以符歷屆奏案如蒙 俞允臣等札飭該道設立公司妥籌開辦仍將勘路事宜隨時呈由 臣衙門及經過各省督撫酌覈飭辦以期詳慎得 旨如所議行○丙午諭委散秩大臣錫光奏敬陳管見請嚴禁軍營逢迎積習一摺逢迎上官最爲軍營惡習現當整頓營伍之際著中外統兵大臣通飭屬員嚴行禁革另片奏戶部銀庫收放銀

兩上下其手及內務府銀庫於應放侍衛盤費津貼等銀任意短欠遲延請飭查禁等語戶部等衙門支放各款豈容稍有弊混著各該堂官隨時稽察認真整頓以杜弊端○丁未諭步軍統領衙門奏查明委散秩大臣裕興被毆情形據實覆陳一摺裕興身為職官並不冠戴輒因開車爭道致被毆辱殊屬不知自重委散秩大臣裕興著交部議處休致侍郎志穎之家人恃眾滋事任意尋毆亦屬目無法紀著步軍統領衙門嚴傳該家丁到案照例懲辦○戊申九吏部議飭御史王廷相回原衙門行走○己酉上御文華殿美國使臣田貝日國使臣葛絡幹英國使臣寶納樂德國使臣海靖奧國使臣齊幹日本國使臣矢野文雄和國使臣克羅伯比國使臣費葛俄國署使臣巴布羅福義國署使臣薩爾瓦葛法國署使臣呂班觀見○諭侍講惲毓鼎奏經濟特科宜議登進之途一摺國家登進人材必須言行相符而後可收實效況經濟一科係屬特設內外臣工尤當仰體破格旁求之意不得以有才無行之人濫登薦牘至該侍講所請仿照從前觀政之例以試其能等語著總理各國事務衙門參酌情形奏明辦理○諭御史王鵬運奏請開辦京師大學堂等語京師大學堂迭經臣工奏請准其建立現在亟須開辦其詳細章程著軍機大臣會同總理各國事務衙門王大臣妥議具奏○榮慶奏時運之盛衰視乎人才之消長比年因時事孔亟迭經中外臣工請擴書院設學堂增報章館書局凡所以爲人才計者已無微不至惟國

家滿漢並重閣部司屬滿漢人員數幾相埒漢員多由科第雖時文帖括不盡真才然本其讀書稽古之心轉而爲實事求是之學潛移默化尙不其難滿員則列科甲者既以少而自矜工繙譯者更狃於習而不化兼以各項考試弊竇難除計典激揚寬縱已久培才之途甚寡用才之地實多在各該堂官當此缺派差未嘗無乏才之歎而事繁人少不能免濫竽之譏於是徒供奔走之流專尙賁緣之輩遂伺隙而承其乏爲長官者以爲予以寸階無害也不知由小而大貪庸遂添要津以爲用一私人無傷也不知積少成多請託竟成習尙前者得志後者效尤顯耗人才噬傷風俗百端流弊職此腐階故欲挽今日之時艱必當自人才始而欲振天下之人才尤當自八旗人員始近聞尙書剛毅現在刑部前在工部均將滿員考試夫刑工兩部可考其餘部院似可推行剛毅一人能爲各部大臣自克舉辦擬請飭下閣部院寺堂官各就本衙門之滿檔房典稽牘司務廳等處爲儲才之地恭置我朝列聖訓諭歷代先正格言以爲警省身心激發忠愛之本次量典章政要治諸律例以及名臣奏議中外輿圖以爲諸習學故講求史治之資旁及公法條約測算製造并西國近事時務報章以爲開拓聞見力圖富強之用以上書籍除各置積有外或由書局咨取或籌開款購置應由各堂官酌辦其課之法凡司員筆帖式之入值者均令次第學習並於考勦簿內註明閱書起訖退值之日各書劄記將所閱之書撮其大綱加以案語呈堂面

候辨論其考之之法先將司員全行考試其學識淺陋不勝樞房之任者撤回本司將各司之優者調充總辦幫辦並兼行之差次考筆帖式其學問中平者勒限學習淺陋者撤出樞房留充雜差所出烏布以各司文理優者補之每季將所著劄記核其虛實分別等第每年由堂官面考二次嗣後凡樞房司中烏布均以屢列優等者充補如此則不必擅議改章矜言變法祇就舊有章程現有人才從實整頓似覺輕而易舉簡而易行抑奴才尤有請者形端者表正大法者小廉伏乞 明降諭旨諄飭各部院堂官念時局之艱難思人才之緊要勿徇情面勿喜逢迎表之以濟廉求之以誠懇如此數年之中卽此部屬滿員必有明體達用博古知今之彥足備 國家中外之用者大局幸甚 上諭內閣侍讀學士榮慶奏請飭培養八旗人才認真考試一摺各衙門司員分理庶政旗員既須考試漢員何獨不然當茲時事艱欲求幹濟之才自不在記誦詞章之末惟講求時務明習例案亦須具有學識始克疏通證明嗣後各衙門滿漢司員著各該堂官自行釐定章程無論何項出身一體面加考試並認真訓飭務使究心實學勉爲有用之才以備朝廷器使將此通諭知之○劉坤一等奏准軍機大臣字寄光緒二十三年七月初十日奉 上諭都察院奏編修支恆榮等以地方彫敝徵收丁漕公費太重請分別裁革據情代奏一摺據稱江蘇丹徒縣徵收地丁每兩折收向不得過千五百文嗣因銀價昂貴每漕一擔加增五百文今則銀價

落至一千二百餘文加增公費之例仍未革除丹徒漕米既不起運加收運費一千文之例究屬名實不符請分別革除裁減等語著劉坤一趙舒翹確切查明應否酌量裁減之處奏明辦理原呈著鈔給閱看等因欽此當即欽遵札飭蘇藩司移行該管道府查明核擬詳辦去後查丹徒一縣山田礮礮十居八九兩陽偶一失時卽成災歉而公費之足用不足用視徵數爲衡徵數短則公費少而不敷度支該縣爲通省著名瘠苦徵收上下兩忙丁銀折價向來每兩僅折錢一千四百九十六文地方官徵不敷解賠累甚鉅經前督撫臣奏明自同治七年始除漕米折價全照蘇松等屬之數徵收外其隨漕公費每石加收錢四文無論本折共收錢一千五百文藉資貼補總計漕米一摺丁銀一兩均勻牽算較他縣尙少收二百文又近年銀價漸短民情困苦經前撫臣趙舒翹先後奏明將光緒二十一二兩年該縣漕糧項下續加之公費錢五百文暫予減免入款愈少辦公益窘年穀順成尙可勉力支持一遇歲歉萬難敷衍所有漕糧每摺隨收費錢一千文本係專指辦漕及津貼常年署中一切公用而言通省一律運費雖有專款與此項隨收公費各不相涉是丹徒漕糧雖不起運而所收公費實與各縣同一開支揆時度勢委實不能再減其暫減之續加公費錢五百文應請永遠裁汰以恤民隱至原呈謂丹徒缺瘠由鎮江關稅量撥津貼或將下游釐局歸縣經理酌支公費等語鎮江關商稅短絀懷款倍增由該關道查覆無力籌給

該縣津貼鎮江下游鹽局爲蘇局收捐大宗歸縣經理恐多窒礙均請毋庸置議據蘇州藩司嚴緝渠具詳前來臣等覆查蘇省各屬徵收冬漕歷年奏明每擔隨收公費錢一千文係專指各州縣辦漕一切公用通省一律升徒縣丁銀折價每兩徵一千四百九十六文較他屬現徵二千文計短收五百餘文其常年一切用款全賴冬漕公費濬用自光緒二十一年起奏減續加之五百文該縣辦公尤形竭蹶編修文恆榮等原呈謂升徒缺瘠似宜另籌善法實已深悉該縣情形若將奏定之公費一千文再議減收無以養該縣之廉相應請旨將升徒縣漕糧公費仍照各屬定章每擔隨收錢一千文以資辦公其續加之公費錢五百文應請永遠減免以甦民困得旨如所請行○庚戌諭胡燏棻奏酌改武科章程請於各省府廳州縣分設學堂教習等語著軍機大臣會同兵部歸入榮祿等前奏內一併議奏○諭胡燏棻奏請就各省現有兵餉精練陸軍一摺方今時局艱難自以練兵爲第一要義各省防練各營近來積習如空額克扣攤派等弊不勝枚舉若不嚴行禁革訓練必不能精營務安有起色至操演之法不宜拘守成格應如何變通盡利之處著軍機大臣會同督辦事務王大臣妥議具奏另片奏神機營改用新式鎗礮各節著一併議奏○壬子加賞梁家園百香堂煖廠粟米二百石○諭張汝梅奏查明分統防營帶缺額扣餉請旨懲儆等語已革提督孫毓林分統束宇正軍駐紮寧海經該撫訪查該管實有缺額扣餉情



事著永不敘用仍發往軍臺効力贖罪以肅戎行○諭禁門清嚴之地咫尺宮廷該值班官兵等各分段落晝夜巡查立法至爲嚴密前因閒雜人等任意出入迭經諭令該管各官申嚴門禁至再至三乃近來日久懈生仍不免有疏於稽察之處周廬樞樞幾同虛設實屬不成事體著前鋒統領護軍統領總管內務府大臣步軍統領嚴飭值班官兵各照所管段落認真巡邏其並非當差之人不准混跡入內以昭嚴肅倘再仍前疎忽定予嚴懲決不寬貸懷之○癸丑理藩院左侍郎紹宜卒予卹如例○諭戶部奏恭親王報効庫平銀二萬兩不敢作爲借款亦不仰邀議敘等語恭親王懿親重臣因國用不足捐備鉅款用意正大洵足矜式自優其忠款之忱朕心尤深嘉許惟現在甫議開辦昭信股票一切章程尙未奏定恭親王首先報効宜將此款歸入戶部股票一律辦理庶幾天下嚮風繼銀領崇更於大局多所裨益該部卽遵諭行○軍機處兵部奏光緒二十三年十二月二十五日內閣奉 上諭榮祿奏請設武備特科參酌中外兵制造就人材等語著軍機大臣會同兵部議奏欽此光緒二十四年正月初六日內閣奉 上諭給事中高燾會奏請設武備特科一摺著軍機大臣會同兵部歸入榮祿奏請參酌中外兵制特設武備片內一併議奏欽此欽遵先後將原奏二件鈔出 臣等伏查榮祿所奏請設武備特科分別格致諸學鎗礮諸科以爲之目益制之武鄉會試姑仍 遵其應特科之人由武童層遞作爲武舉武進士每次限

以三年略舉九年大成之意不必與舊科同歲舉行止須將原有中額之半撥入特科試之有效再將舊制全停自係轉移風氣造就人才起見臣等伏維武科定制沿自有明從前火器尙未盛行卽泰西各國亦迥不如今日之精我朝龍興遼瀋八旗勁旅騎射絕人因而武科亦沿用馬步箭刀弓石各項技藝在當日原屬制勝之具今則製造鎗礮效核準頭精益求精西人謂之藥彈世界弧矢誠不足以威天下習非所用與制藝取士流弊正同改弦更張自宜首議及此惟是變法之始貴乎耳目一新使天下曉然知上意之所在無不踴躍奔赴始足以振作士氣鼓舞人才舉行之年限可稍遲而中額不宜分半應用之鎗礮必畫一而流弊亦宜預防當茲時事艱難事務求核實無取鋪張亦不必有特科名目臣等謹按照原奏各條細心紬繹擇其輕而易舉簡而可行者爲我皇上縷析陳之查武場改試鎗礮係屬創舉武童初學必用教習多用則經費難籌且精於操練兼通西法者一時亦難數遇少則又苦不敷分布卽使一省之中各就府廳直隸州酌爲延聘而武童各安土著距所屬本府州縣遠者或至數百里平時院府兩試已苦跋涉之艱若令就地教練充役三年始准作爲武童誠恐貲斧不繼閱時過久轉致半途而廢惟是國家功令之設不過懸的以招至於儲材待售則視其人之自爲但使明定章程通行各省立定年限自某科爲始廢馬步箭刀石不用所有武場一律改試鎗礮其向應武試者決不至因此

報業自必講求利器磨礪以須制科之詩賦策論八股一易其體士人無不爭自濯磨所謂利祿之途使然初不煩官爲督責也章程既定屆時武童應效仍由各該省學政按臨攷試合格者照額取中武生則進取有資人思自奮矣取中武生之後人數較武童爲少而且發軔伊始已有上進之階應請卽如原奏所擬由地方官酌量設法每省籌立武備學堂一區擇武生之材識聰穎者或年力富強有志觀光自願入堂肄業者酌照省分大小核定人數按名挑入學習重學化學格致地輿諸學分馬步礮隊鎗隊工程隊諸科派定總分教習督同訓練其挑選教習之法如南北洋湖北等省先經設有武備學堂止須酌添教習員數他如直隸之新建陸軍江南之自強軍以及各省所練之洋鎗礮隊熟於以上諸法堪勝教習之任者自不乏人擬請無論官弁勇丁一體就近酌量派充其餘各省由該督撫籌定欵項自行延聘教堂功課聽總教習按照人數勻撥教練官中派員認真稽查其未經挑入之武生仍令回籍自行學習鄉試屆期合一省之武生無論堂內堂外一律由該督撫用教試鎗礮新章詳加攷驗列入優等者照額取中武舉其內場默寫武經原屬具文且易滋弊竇應請卽行裁去新武舉咨送會試卽將本屆新武生挑選換入學習嗣後按照科分挨次輪換風氣一開互相傳習挽礮張者廢然思返不必仍留舊額之半亦不患應試乏人矣各省既設武備學堂整齊畫一新中武舉人數真然可觀京師首善之區自應設立

武備大學堂以舊衆材而光盛興惟是大學堂規模較之各省尤爲繁重一切應定章程應用器具亦非倉猝所能集事且各行省既經通設學校如林其八旗順天武生或山該地方官先行設立尋常學堂或就近往天津學堂學習均無不可京師大學堂之設似可稍緩各省武舉亦毋庸再限三年在京肄業擬請每屆武會試之年先期由各省督撫將此項武舉咨送兵部由部奏請 欽派王大臣攷試仍照鄉試之例以鎗礮中靶之數爲斷擇其優者取中武進士名數與常年中額相同其 殿試兩場尙有應行略爲變通之處擬請先期由兵部奏明請 旨辦理至給事中高燾會所奏專爲求將帥之材備教習之選先設京師武備學堂然後遍及各行省所陳五事除練身體習鎗礮二條外餘三條皆專門名家所難倘責令武生武舉等驟等而進必至有名無實徒滋繁費餘與榮祿所奏大致略同應請毋庸置議以上各節臣等悉心核議參酌中外擇善而從寓營制於武科舉之中陰以兵法部勒之與泰西預備兵留後兵之意相合 竊更誠能認真舉行需以歲月有勇知方之士必有脫穎而出者卽綠營練勇亦可收互相觀摩之益矣其未盡事宜及應駁緣由摺內未及詳敘者另列簡明章程十條開單恭呈 御覽抑臣等更有請者 國家軍政自提鎮以下一切武職本以行伍爲正途其武舉武進士原不過聊備一格道光以前姑不具論卽如咸豐同治以來蕩平粵捻在事將帥滿洲如多隆阿塔齊布漢人如鮑超劉松山皆

係行伍出身將爲名將武科所得率多偏僻奔走之材斷不能與文場鄉會相提並論卽歐美各國講求武備如英國德國之水陸軍大書院美國之委士盤大書院皆情願入伍之人始准入堂學習學成之後卽令分隸各營充當士卒並無所謂武科也今欲建威銷萌折衝樽俎宜就各省營勇認真挑選厚其贍資嚴其功課腹心干城之寄在彼不在此至於武科改制臣等今日所議已得其大概宋臣蘇軾所謂取士之法不過如此不得謂區區一科遂足盡天下之人材也又奏正在繕摺間欽奉正月二十六日 上諭胡燏棻奏酌設武科章程等語著軍機大臣會同兵部歸入榮祿等前奏內一並議奏欽此查該府尹所奏亦主改試鎗礮與榮祿等原奏大致略同其所請以馬二礮二步六分成取中先由兵部核定額數一節礮礮良多如以人數分別馬步礮則武場非營陣可比無所謂馬隊礮隊步隊也如照一人所試各項分別成數卽使照該府尹所擬首場仍試騎射次地球改爲步法手法次刀弓石改爲鎗礮亦難強分爲三六成原奏聲敘既未明晰兵部亦無從核定額數應請毋庸置議至各省會設大學堂各府廳設中學堂各州縣設小學堂似乎章程明備然現在各省議設各種學堂已非易易若專爲武備一項安得如許財力廣爲分設且武舉生童等風氣甫開自不如久經訓練之勇丁較爲得力勇丁且未能多設學堂何論武科又如默寫五經一場改試策論取其熟悉輶略並洞明行軍之法方爲中選等語查武科內場

從前本試策論嗣後默寫武經誠以簡略精微非粗通文字之武人所能猝辦若仍改策論徒屬具文應無庸議他如鎗礮中絕之成數教習之功課攷選之多寡事關變法必應逐細講求或待臨時斟酌均非臣等所能懸擬大抵國家定制貴在簡明若節目太繁必有不能推行盡利者該府尹所奏各節業經臣等於議覆榮祿等摺內分別准駁其詳細章程應由兵部隨時會同京外承辦各衙門斟酌妥議分別奏咨辦理上諭前據榮祿高燾曾胡燏棻先後奏請設武備特科擬以章程各摺片當經諭令軍機大臣會同兵部議奏茲據該王大臣分別准駁詳議覆奏並擬定大概章程開單呈覽朕詳加披覽尙屬確實可行國家設科武備與文事並重原期遴選真才以備折衝之用現在風氣方新雖無庸開設特科亦應參酌情形變通舊制著照該大臣等所擬各直省武鄉試自光緒二十六年庚子科爲始會試自光緒二十七年辛丑科爲始童試自下屆科試爲始一律改試鎗礮其默寫武經一場著卽行裁去所有一切未盡事宜及各省應如何設立武備學堂之處著該衙門隨時奏明辦理現在時局艱難朝廷釐定章程專務興實學武場改試鎗礮亦轉移風氣之一端嗣後主試之王大臣及各省督撫學政尤當加意講求認真攷核務在作其忠勇開其智識平時則嚴督功課校試則秉公去取毋得奉行日久又成具文致負作育人材之至意○甲寅以清銳爲理藩院左侍郎○諭御史胡孚宸奏經濟歲科生監請嚴定錄送

章程等語著禮部議奏○諭裁兵節餉等事爲今日萬不可緩之圖迭經諭飭各省將軍督撫認真籌辦不准藉詞搪塞連日據魏光燾張汝梅王文韶先後奏到詳加披閱無非滯陳該督撫辦事艱難籲稱寬時日或竟稱裁無可裁減無可減或稍有汰除仍寥寥無幾其於各營之廢弛缺額俱不置詞似此敷衍塞責任意遷延何日始能見諸實政朕宵旰焦勞臨朝太息苟非萬不得已豈肯裁及佳兵無如時勢所迫不得不先其所急安能以有用之餉養無著之兵徒使不肖營員窺宅其中剋扣侵吞習成慣技督撫瞻徇情面亦復代爲文飾置國家大局於不顧實堪痛恨爾臣受恩深重手握兵符於分內應辦之事每苦力不能舉辦亦可謂無術之甚矣自此次中諭之後該將軍督撫等各矢天良悉心籌畫經制之兵何處可以歸併何處可以全裁挑練之勇某營應行改章某營應行遣撤及一切糜費應如何節省逐一確切查明迅速辦理但能省一分無著之餉卽可添一分有用之兵勉矢惻忱朕言不再倘或意存遷就於可裁之兵可節之餉仍有不實不盡一經查出朕必治以抗違之罪莫謂冊籍不符難於綜核外間積弊終不能知也將此通諭知之